

**EKALESIA FAAPOTOPOTOGA KERISIANO SAMOA
CONGREGATIONAL CHRISTIAN CHURCH SAMOA**

**TUSI MO FAIA'OGA O A'OGA ASO SA
SUNDAY SCHOOL TEACHERS TEXTBOOK**

2 0 2 3



**VASEGA FEOLOLO
MIDDLE CLASS
(11 – 13 tausaga)**

**MATAGALUEGA O A'OA'OGA KERISIANO
DEPARTMENT OF CHRISTIAN EDUCATION**

UPU TOMUA

E mua'i faatalofa ma faafeiloai atu i le paia tele o le Eklesia Faapotopotoga Kerisiano Samoa i ona tulaga faalupeina, i le Suafa pele o Iesu Keriso lo tatou Taitai Sili. Ua faamalo le soifua manuia ia outou susuga i Toeaina, susuga i Faafeagaiga, Faifeau, A'oa'o ma Faletua, tainane foi afioga i Tiakono, susuga i alii ma tamaitai Faiaoga o tatou Aoga Aso Sa, faapea foi peresetene ma taitai o tatou Autalavou. Ia viia lo tatou Alii, i la outou molimau atu, o fita i tuga ai mo le Alii ma le Tala Lelei, e ala atu i mataupu a le Aoga Aso Sa ma Autalavou.

Ua tatou talitonu, o le Tusi Paia o le Upu a le Atua mo tagata uma, ma ua i ai i totonu vaega uma ua tatou naunau ia iloa, ina ia tumau mausali pea lo tatou sootaga lelei ma le Atua, ma ia tatou ola ai i le ala tatau e tusa ma lona finagalo. O le mea lea ua tatou talitonu ai, i le matuā taua o le a'oa'oina tatau o fanau laiti ma talavou mai le Tusi Paia. E ao ina a'oa'oina atu ma le faautauta lelei, le uiga moni o vaega o le Tusi Paia ua fia a'oa'oina atu, i se auala talafeagai e tusa ma le matutua ua i ai tamaiti.

1. O le Tusi o Aoga Aso Sa ma Autalavou, ua saunia lava faapitoa mo Aoga Aso Sa ma Autalavou a le Eklesia Faapotopotoga Kerisiano Samoa. O lona uiga o le meatotino lava a le EFKS, e le faatagaina faaletulafono ona toe lomia e se tasi, e aunoa ma le faatagaga a le Eklesia. O lea e fautuaina ai foi le Aufaigaluega, o faiaoga o Aoga Aso Sa ma Taitai o Autalavou, i le taua o le teu faalelei pea o Tusi Aoga, e toe saili i ai mo se fesoasoani pe a moomia.

2. O Mataupu o Tusi Aoga Aso Sa ma Autalavou 2023, ua maua lea i le upega Tafailagi (website) a le EFKS; www.cccs.org.ws. Faamolemole ia fesootai mai lo tatou Ofisa i Mulinuu mo se fesoasoani, ma nisi vaega e fia malamalamā i ai, i le telefoni 24340, po o le e-meli-extneduc@cccs.org.ws.
3. Ua lē o toe fa'aalia i le faasologa o Mataupu i Aso Sa taitasi, vaega masani o le a'oa'oina o mataupu, e pei o le Tatalo Amata, Faafeiloai le vasega, faamanatu mataupu talu ai, tatalo e faapaia ai le sene ma le Tatalo Faaui. Peitai o vaega masani nei e tatau lava ona fai i Mataupu o Aso Sa taitasi. Ua tuuina atu i Tusi Aoga Aso Sa a le Vasega Amata, Vasega Laiti, ma le Vasega Feololo, fati o pese (nota) fou mo nisi o mataupu.
4. Mo le silafia e Tamā o le Eklesia ma le aufaigaluega faifeau, e i ai le taimi e toe saili mai ai e lo outou mamalu le ofisa o le MAK, mo nisi Tusi Aoga. Peitai, ua māua e le ofisa nei, o nisi tagata, e lē o ni tagata lotu iā tatou, auā latou te leiloa le suafa o lana faifeau. O lea e tatalo atu ai, o le a lē toe talaina ni tagata faapea e omai i ni Tusi, sei vagana faafeagaiga ma ē omai ma se faamaoniga mai lana faifeau. E lē mafai foi ona faamatuu atu ni Tusi Aoga i nisi o la matou aufaigaluega e aunoa ma se faamaoniga mai le faifeau.
5. Afai ua i ai se lape i le galuega nei, e matua atu i la outou tofā faale-Atua e magalo ai le aufaigaluega vaivai. Pe afai foi e i ai ni fautuaga taua mo le faaleleia atili o le galuega, faamolemole fesoota'i mai lo tatou Ofisa i tuatasī o i luga, pe lafo mai i le Pusa meli 163, Apia.

6. Ua saunia le Tusi Aoga mo le Vasega Feololo e le susuga ia Semikueva Su'a FS, Farani Pauga FS ma Faalefu Tumutalie FS ma

Ia faamanuia le Atua i le galuega o lenei tausaga, auā le a'oa'oina o alo ma fanau a le Ekalesia, ina ia tutupu a'e ma le fiafia e faitau le Tusi Paia ma ola matata'u i le Atua.

Soifua ma ia manuia
O la outou auauna

Maleifua Taniesu
(Faatonu A'oa'oga Kerisiano)

AUIVI VASEGA FEOLOLO 2023

MANATU AOA: IA AVEA LE ATUA MA TA'IALA I LE OLAGA

MANATU TA'IALA O IANUARI & FEPUARI:
O IESU LE TA'ITA'I SILI

IANUARI

- | | | |
|----|---|---------------|
| 29 | O Iesu lo tatou taiala
(Aso Sa Tupulaga) | Ioane 13:1-10 |
|----|---|---------------|

FEPUARI

- | | | |
|----|----------------------------|-----------------|
| 5 | O le ala i le ola | Ieremia 21:8-10 |
| 12 | Ola sauniuni i taimi | Mataio 24:42-44 |
| 19 | Savali ma le faatuatua | Eperu 11:1-9 |
| 26 | O le Atua e mamalu ma paia | Isaia 33:21-22 |

MANATU TA'IALA O MATI: MALOSI O LE ATUA

MATI

- | | | |
|----|--------------------------------------|-------------------|
| 5 | O le mana o le Atua e tuli ai temoni | Luka 11:14-26 |
| 12 | Tagata o Iapese | 1 Samuelu 11:4-11 |
| 19 | Ua faasa'oloto Peteru ma Falepuipui | Galuega 12:6-11 |
| 26 | Faafetai i le sogi | Kenese 33: 1 – 17 |

MANATU TA'IALA O APERILA:
IA ONOSA'I I FAIGATĀ O LE ALA

APERILA

- | | | |
|----|--|----------------|
| 2 | O le malaga a le tupu o tupu
(Aso Sa Laupama) | Mataio 21:1-11 |
| 9 | E manumalo Iesu i le oti
(Aso Sa o le Toetu) | Mataio 28:1-10 |
| 16 | O le alofa o le Atua | Roma 8:38-39 |
| 23 | Ia iloa le va ma le Atua | Iopu 42:1-6 |
| 30 | O ai lou Atua? | Salamo 18:2-5 |

MANATU TA'IALA O ME: O LE AGALELEI O LE ATUA

ME

- | | | |
|----|--|---------------------|
| 7 | Ua agalelei le Atua ia Iona | Iona 4: 1 – 11 |
| 14 | Sena e, faauta o lau tama
(Aso Sa o Tinā) | Ioane 19: 25 – 27 |
| 28 | O le meaalofa sili | 1 Korinito 13:1 – 7 |

MANATU TA'IALA O IUNI: O LE ATUA LE ALA

IUNI

- | | | |
|----|--------------------------------------|--------------------|
| 4 | O ala o le Atua o ala o le faatuatua | Kalatia 3: 10 - 18 |
| 11 | Mulimuli i le ta'ita'iga e manuia ai | Iosua 1: 1 – 9 |
| 18 | Ui atu i le faitoto'a | Ioane 10: 1 – 6 |
| 25 | O le malaia o Etoma | Opetaia 1: 1 – 21 |

MANATU TA'IALA O IULAI:

I TOTONU O FAIGA O LOO I AI LE ATUA.

IULAI

- | | | |
|----|--------------------------------|--------------------|
| 2 | O le feagaiga a le Atua ma Noa | |
| | | Kenese 9:12-17 |
| 9 | O ma'a faamanatu | Iosua 4: 1 – 7 |
| 16 | Olioli o le faamagaloga | Salamo 32:1-5 |
| 23 | Faaatuatua i totonu o faigata | Roma 5: 1 – 5 |
| 30 | O le manumalo ia Keriso | 2 Korinito 2:12-17 |

MANATU TA'IALA O AOKUSO: IA FAAMUAMUA LE ATUA

AOKUSO

- | | | |
|----|--|--------------------|
| 6 | Usita'i muamua | 1 Samuelu 15:1-12 |
| 13 | O le faamalosiau aoga
(Aso Sa o Tamā) | 1 Timoteo 1: 1 – 5 |
| 20 | Ia onosa'i ma mataala | Mataio 25: 1 – 13 |
| 27 | Faigaou e faavae i le alofa | 1 Samuelu 19:1-7 |

**MANATU TA'IALA O SETEMA:
IA FAAMAONI I LE LOTO SALAMŌ**

SETEMA

- | | | |
|----|--|-----------------|
| 3 | Ia avea ma tala e lelei
(Aso Sa o le Talalelei) | Kenese 45:25-28 |
| 10 | Alofa e moni ma faamaoni | Esoto 2:1-10 |
| 17 | E lē lelei le taufaavalea | Mareko 10:17-22 |

- | | | |
|----|---------------------|---------------|
| 24 | O lefafine tua pi'o | Luka 13:11-17 |
|----|---------------------|---------------|

MANATU TA'IALA O OKETOPA: AVE LE FANAU I LE ALII

- | | | |
|----|---|-------------------|
| 22 | O fanau o u fanafana i le lima o le toa | Salamo 127: 3 - 5 |
| 29 | Tumau i le Atua, tete'e i le tiapolo | 1 Peteru 5:5-11 |

**MANATU TA'IALA O NOVEMA:
FAAMALOSI I LE VALAAUINA**

- | | | |
|----|---|-------------------|
| 5 | Ua tofia Iosua e fa'aauau le ta'ita'iina o le nuu | Iosua 1:1-9 |
| 12 | Fa'aaoga lelei le avanoa ua maua | Luka 10:38-42 |
| 19 | Ia manatua le feagaiga | Teuteronome 5:1-6 |
| 26 | Ia mulimuli ia Iesu | Mareko 1:16-20 |

**MANATU TA'IALA O TESEMA:
UA FANAU MAI LE TUPU O TUPU**

TESEMA

- | | | |
|----|--|------------------|
| 3 | Malo o le Atua o le a o'o mai
(Aso Sa o le Etiveni) | Isaia 2: 1 – 4 |
| 10 | O le tupu e tulivae uma ai le lalolagi | Filipi 2: 1 – 11 |

MANATU TAIALA O IANUARI & FEPUARI. “O IESU LE TAITAI SILI”.

Viia le Atua ua mafai ona tatou aulia mai le amataga o a tatou aoga Aso Sa i le amataga o lenei foi tausaga fou 2023. E faafetai ai i lo tatou Atua aua o Ia o le Atua foafoa, na faia le lagi ma le lalolagi ma mea uma o i ai. Na ia faia i tatou i lona faatusa, faatasi ai ma lona finagalo ia tatou iloa ona tatou faafoi le faafetai ma ola vivii ia te Ia. E ao la ona tatou mulimuli i ona ala, ua faailoa mai i ana Afioga Paia, ma ia avea o Ia ma o tatou taitala silisili, e tapasaina ai o tatou olaga tatou te manuia ai.

ASO SA : **29 IANUARI 2023 (Aso Sa Tupulaga)**

MATAUPU: **O IESU LO TATOU TAIALA.**

SINI : Ia malamalama le vasega i le ala ua faailoa mai e Iesu tatou te savavali ma mulimuli ai.

TUSI FAITAU : Ioane 13:1-10.

FESOASOANI MO FAIAOGA :

O Iesu o le taitai o le au soo e toa sefulu ma le toalua, ae sa le'i vaoia ai o Ia mai lona faailoa manino atu i ona soo le auala e tatau ona ola ai, ina ia manuia ai, e ala i le mulumuluina o o latou vae. O le agaga maualuga lea ma le faamoemoe o Iesu, ina ia iloa e ona soo e taua le femulumulu'i po o le fesoasoania'i o le isi i le tasi. Afai e i ai se mea e manaomia ai e le isi tagata se fesoasoani, ia aua lava nei tuua se auaunaga alofa e tatau ona faia mo lena tagata. O se auaunaga po o se tautua e te faia e te agalelei atu ai i se isi ou uso a tagata, po o ou matua foi, aemaise o le auauna a le Atua, o inā e auala atu ai faamanuiaga mo lou olaga.

O upu a le atunu, o le ala i le pule o le tautua. E iloga lava e na tautua faamaoni a'o talavou, a oo i taimi e tulai mai ai e fai ma taitai, e ese le matagofie o le faatinoina o o latou tofiga. E le gata ina fiafia i ai tagata, ae faamanuiaina foi o Ia e le Atua i so o se ala. Tamaiti o le faamoemoe foi lea o le Alii o Iesu mo i tatou, ia avea i tatou ma auauna lelei ma tautua faamaoni i so o se mea, i totonus o a tatou aoga, o totonus o aiga, o nuu ma le Ekalesia ma so o se mea lava. Aua nei galoo a oo ina tatou matutua ma avea i tatou ma taitai, ia tatou manatua le faataitaiga sili na faia e Iesu i ona soo. Na tuua lava lona mamalu o ia o le taitai, ae na ia faatinoina lava le auaunaga o le mulumuluina o aao o ona soo. E le gata ina ia faamamaina ai i latou faale tino, ae sili ona faamamaina ai i latou faa le Agaga. Ia tatou manatua lona alofa silisili mo i tatou lea na ia ofo mai ai lona ola e sui ai ma faamagaloina ai a tatou agasala. Ua faaeaina o Ia e lona Tamā ma ua tuuina ia te Ia le pule aoao i mea uma.

Uiga o Upu:

- i) talisuaga - tausamiga, aai faatasi,
(feast, banquet)
- ii) mulumulu - soloi, fufulu, (wash)

GALUEGA FAATINO: Faatinoga.

Faatino le tala o le mulumuluga e Iesu o vae o ona soo. Ia iai se apavai ma se ie soloi, ma ia tofi se tasi e fai ma Iesu na te mulumuluina vae o ona soo, faapei ona faamatalaina mai i le tusi faitau.

PESE: Ua ou filifili e mulimuli ia Iesu.

A'OA'OGA :

1. Ia avea Iesu e fai ma o tatou taitai i taimi uma.
2. O le lotomaulalo e faaeaina ai.

ASO SA : **5 FEPUARI 2023.**

MATAUPU : **USITAI E OLA AI.**

SINI : Ia malamalama le vasega, o le usitai i le finagalo o le Atua, tatou te maua ai le ola.

TUSI FAITAU : Ieremia 21:8-10.

FESOASOANI MO FAIAOGA:

O le tala sa tatou faitauina mai le tusi a le perofeta o Ieremia, o lo o faailoa mai ai le taumafai atu o le perofeta e faailoa le finagalo o le Atua i le nuu o Iuta. A o le mea ua tupu, ua fiu a Ieremia e faailoa atu le finagalo o le Atua i le nuu, ae ua faamaaina pea o latou loto. Ua malosi le fiafia i le ifo i tupua ma le ola agasala. E amata mai lava i le tupu le lē gauai ma le lē usitaia o le finagalo o le Atua. O le ala foi lea o le toasa ai o le Atua ma ia faatagaina ai le malo Papelonia latou te vagaia, sasa ma ave faa-pagota i latou i Papelonia.

Ua faailoa manino i ai e Ieremia le finagalo o le Atua mo sā Iuta. A fia maua e i latou le ola, ona agai lea e o i le tafeaga i Papelonia, aua a fai ae le usitai e mautinoa lava e fano uma lava i latou, aua o lea ua toasa le Alii ona o o latou uiga ma amio ua le tusa ai ma lona finagalo. Afai foi e i ai nisi e tete'e pea, e mautinoa a e fano lava i le pelu atoa ai ma faamai ma le oge, ona o le malosi o le ola agasala ma le ifo i tupua o ona tagata.Ua latou le manatu i tulafono aemaise o le uluai tulafono na aoaoina ai i latou e augatama o le nuu, "Aua nei fai mo oe ni atua ese i ou luma".(Esoto 20:3)

Tamaiti, e le'o se mea lelei le lē usitai i le finagalo o le Atua, aua e oo mai ai puapuaga ma faigata ia i tatou. Peitai, o le taua o le usitai i le finagalo o le Atua, e le gata tatou te maua ai le ola ma faasaoina ai i tatou mai faigata, ae tatou te mauaina ai foi faamanuiaga e tele. E leai a se isi auala tatou te mauaina ai le ola, ua na o le usitai lava i o tatou matua ma o tatou ta'ita'i ma faia le

finagalo o le Atua ona tatou maua lea o faamanuiaga eseese e le gata i le tino, mafaufau, ae silisili ai faamanuiaga i la le Agaga. O le galuega foi lea a le faafegaiga faapea matua ma faiaoga Aso Sa o lo o fai, e pei foi ona faia e le perofeta o Ieremia, o le faailoa atu lea o le finagalo o le Atua, ina ia aua nei o tatou faia le agasala, aua e oo mai ai puapuaga ia i tatou. Ae ia tatou usitai i le finagalo o le Atua faapei ona usitai Iesu i le finagalo o lona Tamā.

Uiga o Upu:

- | | | | |
|------|--------|---|--------------------------------------|
| i) | vavae | - | siilima atu, (give up) surrender. |
| ii) | vete | - | oloa po o tamaoaiga e maua mai taua. |
| iii) | vagaia | - | siomia |

GALUEGA FAATINO : FAATUMU AVANOA

Faatumu avanoa i upu ua tuuina atu i lalo;

faamai, afi, vete, manuia, susunuina, vagaia, outou, tupu, vavae, fetalai, oti, faasaga, leaga, pelu, ola, oge.

Faauta ou te tuuina i o luma le ala o le ma le ala o le..... O lē nofo i lenei aai e oti o ia i le, ma le,ma le; ao lē alu atu maatu i tagata o Kaletaia o eoutou, e ola o ia, e avea foi lona ola ma ana Aua ou teatu i lenei aai ia ai, ae le ina iaai, o lo omai ai le Alii; e tuuina atu ai i le lima o leo Papelonia, efoi e ia i le

PESE : Faalogo ma usitai..

A'OA'OGA :

1. O Iesu o le ala, upu moni, ma le ola.

2. Usitai i faatonuga a matua faapea o tatou taitai.

.....

ASO SA : **12 FEPUARI 2023.**

MATAUPU: **OLA SAUNIUNI I TAIMI UMA**

SINI: Ia malamalama le vasega i le taua o le ola tapenapena ma sauniuni i taimi uma.

TUSI FAITAU: Mataio 24:42-51.

FESOASOANI MO FAIAOGA:

O le tatou mataupu i le taeao lenei, o lo o talanoa ai Iesu e faatatau i le ola sauniuni i taimi uma, aua e leiloa le taimi ma le ituaso e afio mai ai le Alii, ae lelei ona afio mai ua sauni i tatou. O le afio faalua mai lea o le Alii e faatino lana faamasinoga tonu (final judgment) ma iloa tino ai i latou, o e sao atu i le ola e faavava.

O le ola sauniuni la i taimi uma o le salamo nei loa mai le ola agasala ae usitai e faia le finagalo o le Alii. O le taua lea o le ola sauniuni i taimi uma, aua e leiloa e se tasi le taimi ma le ituaso e afio mai ai o Ia. Ae manatu lava o le ala foi lea, e lē ta'uina mai ai e le Alii se taimi faapitoa e afio mai ai o Ia, aua e ono faatuputeleina ai le agasala o tagata. Ina ne'i manatu nisi ma faapea ane, seiloga lava e latalata i le aso e afio mai ai le Alii, ona faatoa salamo lea. Peitai, ua tuu mai lava e le Alii i tatou, sei o tatou filifili i le lelei po o le leaga seia oo ina afio faalua mai i le aso tele o lana faamasinoga. O le aso e tuuiseese ai mamoe ma oti. O mamoe, o i latou ia sa ola sauniuni, ma usitai ma i le finagalo o le Alii, a'o oti o'i latou ia ua faatamala ma lē sauniuni ua le saofagā i le ola e faavavau.

O se faamanatu mai foi lea o lenei mataupu mo i tatou le fanau. Ia tatou ola sauniuni nei loa i taimi uma, usitai i matua, toaaga e

fai meaaoga e sauniuni ai mo suega, ma ia tatou tutumau i le usitaia o le finagalo o le Alii. Ia tatou taumamao mai le faia o mea e inosia e le Alii, e agasala ai tatou, auā tatou te leiloa lava le taimi ma le ituaso e afio mai ai o Ia, a o lo o lava tapena i tatou uma.

Uiga o Upu ma Fuaitau:

- | | | | |
|------|----------------|---|---|
| i) | faafiaamiontu | - | faafoliga mai e amiontu ae pepelo. |
| ii) | taufaitagiae | - | tagitu'i, (weeping) |
| iii) | lilivau o nifo | - | atinū nifo, u nifo,
(gnashing of teeth). |

GALUEGA FAATINO : Faatinoga.

Vaevae le vasega i vaega e lua, vaega muamua o le aoga, vaega e lua o taaloga; faamatala mai e vaega taitasi po o a ni a latou sauniuniga ma ni a latou tapenaga aua le faaleleia o a latou vaega filifilia, ina ia taunu manuia ai a latou tausinioga.

PESE : Tapena ita ma faataele.....

Tapena ita ma faataele
O se pulumu ma se paste
O lo'u ulu ia faamamā
Ma lo'u tino ia faapena
Taga'i ane i lavalava
Po ua malo i se masoā
Sa ta meaai nei galo
Ne'i mole o si o'u manava

A'OA'OGA:

- Ia mataāla ma sauniuni i so o se taimi.

2. Ia usitai ma savali i ala o le Alii i taimi uma.
 3. Toaga e tatalo i le Atua i aso uma.
-

ASO SA: **19 FEPUARI 2023.**

MATAUPU: **SAVALI MA LE FAATUATUA I LE ATUA**

SINI: Ia malamalama le vasega, o le savali ma le faatuatua i le Atua, e maua ai le lototele ma le faamoemoe ola.

TUSI FAITAU: Eperu 11 : 1 - 9.

FESOASOANI MO FAIAOGA:

O le faatuatua, o lea lava ua manino lona faamatalaina mai i le fuaiupu muamua o le tusi faitau mo le tatou mataupu i lenei taeao. O lo o aumai ai foi ma suafa po o igoa o nisi o'i latou ua iloga i tala faasolopito o le Tusi Paia lo latou soifua faatuatua i le Atua e pei o Apelu, o Enoka, o Noa, ma Aperaamo, o i latou na tupuga mai ia Atamu. O lo o ta'ua mai ai foi tiute ma galuega sa valaauna ma faatinoina e'i latou nei, o lo o atagia manino mai ai le moni o le soifua faatuatua i le Atua, o i latou e pei ona ta'ua.

O lo o ua faamanatu mai ai foi le osiga taulaga a Apelu ma lona uso o Kaino, o le faatuatua o Apelu i le Atua, na ia ave ai uluai tama pepeti a ana manu e osi ai lana taulaga i le Atua, lea na talia lelei ai ma fia silasila i ai le Atua, ae sa lei silasila o Ia i le taulaga a Kaino. Atonu e fua a e le Atua i le loto ma le agaga e faatino ai taulaga a tagata. O Enoka o lo o ta'ua mai i le Kenese e lima fuaiupu e 22 ma le 24 na feoai ma le Atua atoa ai ma lona faatuatua i le Alii lea na ave olaina ai o ia e le Atua i le lag. O le faatuatua o Noa na ia fausiaina ai le vaa, e pei ona fetalai atu ai le Atua ia te ia, lea na faasaoina ai manu e tele faatasi ai ma lona aiga mai le lolo sa faaumatiaina ai le lalolagi agasala. O le faatuatua o Aperaamo na ia toe ofoina atu lona atalii e toatasi e

osi ai le taulaga i le Atua atoa ai ma lona usitai i le finagalo o le Atua, e pei ona ia tuua ai lona nuu ma lona aiga ae alu i le nuu na te leiloa. O le ala lea na faamanuia ai i ai le Atua ma fai ai o ia ma tupuaga o nuu e tele o le lalolagi, o ana fanau e pei o fetu o le lagi ma oneone o le sami, e manuia ia te ia aiga ma nuu uma o le lalolagi.

Tamaiti, o le taua lea o le savali ma le faatuatua i le Atua, o le tatou talitonu lava lea o lo o soifua Le Atua, ma na te faataunuina lava ma faia mea uma ua ia folafolaina mai mo i tatou. E le gata la e manuia ai i tatou, ae manuia ai foi o tatou aiga, nuu ma Ekalesia, e oo lava foi i si o tatou atunuu. O le savali ma le faatuatua, tatou te lē faatinoina ai ni mea e inosia i luma o le Atua poo mea tatou te agasala ai, ae tau lava o mea lelei e fia silasila i ai le Atua, e auala mai ai faamanuiga eseese e tele mo i tatou uma. Tatou savavali nei loa ma le faatutua faamaoni tatou te maua ai le lototele ma le faamoemoe ola tatou te auauna atu ai i le Atua i le agaga ma le faamaoni faatasi ai ma o tatou uso a tuaoi.

Uiga o Upu:

- | | | | |
|------|-------------|---|-------------------------|
| i) | mata'u | - | fefe pai'a, (holy fear) |
| ii) | anaana | - | usitai, (obey) |
| iii) | folafolaina | - | tautoga (promise) |

GALUEGA FAATINO : FAATINOGA.

Tofi ni paga se lua pe tolu, ona fusi lea o mata o le isi toatasi, ia leiloa e ia le mea e savali ai, ae faatonutonu e le isi ana paga le mea savali solo ai. Ia sa'o lana savali i mea uma e faatonu atu ai e lana paga, e iloa ai lona faatuatua ua mauaa.

PESE: Have faith in God my Soul.

A'OA'OGA:

1. Aua le faatuatua itiiti.
 2. O le Atua o lo tatou malosi lea.
 3. Ia naunau e fai mea sili mo le Atua.
-

ASO SA:

26 FEPUARI 2023.

MATAUPU:

O LE ATUA E MAMALU MA PAIA.

SINI:

Ia malamalama le vasega, e ao ona ava ma matata'u tagata uma i le Atua, aua e Sililiese ma mamalu lona Suafa

TUSI FAITAU : Isaia 6 : 1 – 6

FESOASOANI MO FAIAOGA :

I le tatou mataupu i lenei taeao, o lo o tatou talanoa ai e uiga i le Atua, lo tatou Alii, o lē na faia i tatou. I le molimau a le perofeta o Isaia i lana tusi sa tatou faitauina, o loo faailoa mai ai e Isaia o le Atua e mamalu ma paia. Na amata lava i le maliu o Usia, o lē sa fai ma tupu o Iuta. Ina ua ma'i o ia i le ma'i lepela ma maliu ai lava, talu ai ua ia ulufale ma le lē tatau i le nofoaga paia e na'o ositaulaga e taga ona ulufale i ai. O le faailoga lea o le Atua e mamalu ma paia. E le taalo i ai se tasi.

Peitai o le vaalaauina o Isaia e fai ma ave feau a le Atua, na ia molimaunia ai le mamalu ma le paia o le Atua. Na ia vaaia le Afio ai o le Alii i lona nofoalii mamalu, faatasi ai ma serafi ia poo agelu faimai e tai ono o latou apaaau. O lo o latou pepese ma faapea atu, e paia, e paia, e paia le Alii o 'au, ua tumu le lagi ma le lalolagi i lona mamalu.

Sa lagona e Isaia lona faatauvaa, aemaise o lona le talafeagai ai ma le mamalu silisiliese o le Atua, na manatu o ia ai a fano, peitai

na ave ane e le agelu le malala ola ma tuu atu i ona laugutu. O le faailoga o le faamagaloina o ana agasala. Ua valaauna ma ua faapaiaaina o ia e le Atua, aua lana feau ma lana galuega. E uigaese le valaauna o Isaia, aua e leai se tasi e mafai ona vaai i le Atua ma ola pea ia, Esoto (33:20), peitai, o le finagalo o le Atua o le ti'a e le seuia, ma le mua e le fuatia. E pule aoao lava ia e tusa ai ma lona finagalo paia e fai toatas.

O se faamanatu mai foi lea o le mataupu o lenei taeao moi tatou le fanau. E ao ona faapaiaaina i tatou e ala i le faaeetiaina o tatou tofi eklesia, ina ia tatou auai i le aiga paia o le Atua, ma mafai ai ona tatou talia le sakalameta o le faamanatuga o le tino ma le toto o lo tatou Alii o Iesu. Ia tatou faamuamua le faia o lona finagalo, aemaise ia tatou ava ma fa'aaloalo i tagata matutua, ae silisili ai ona tatou matata'u ma ava i le Atua, aua e mamalu ma paia o Ia.

Uiga o Upu ma Fuaitau:

- | | | | |
|------|---------------|---|--|
| i) | nofoalii | - | nofoa o le Tupu, (throne) |
| ii) | serafi | - | agelu i le nofoalii o le Atua (seraphim) |
| iii) | fano | - | faaumatiia (ruined) |
| iv) | laugutu leaga | - | laugutu agasala, (uncleaned lips) |
| v) | malala ola | - | malala ola o le afi, (live coal) |

GALUEGA FAATINO : PASO

Saili mai upu nei mai totonu o le pusa ua tuuina atu i lalo.

valaau, tagata, nuu, laugutu, paia, agasala, pai, lele, oti, serafi.

M	S	E	R	A	F	I	S	M	G
U	V	A	L	A	A	U	F	L	N
T	A	O	E	A	T	P	A	I	A
O	P	A	I	U	T	L	E	L	E
T	O	U	G	M	S	A	M	I	O

I	N	U	U	P	A	P	G	S	F
M	A	L	A	L	A	O	L	A	E
L	F	A	G	A	S	A	L	A	T

PESE : To God be the glory....

A'OA'OGA:

1. Ia tatou ava ma matata'u i le Atua.
 2. Usitai i matua, ma ē ta'ita'i aemaise auauna a le Atua.
 3. Ia toaga e ola vivii ma auauna i so o se ala mo le Atua.
-

MANATU TAIALA O MATI: MALOSI O LE ATUA

E i ai taimi e lagona ai le vaivai ma le fa'atauva'a o le tagata. A o'o fo'i ina lutia i tatou i fa'afitauli o le olaga, e matua'i fa'avaivaia ai lava le toatele. Peita'i a o'o ina o tatou vaivai, ona o tatou malosoi ai lea i le malosi ma le mana o le Atua.

ASO SA: **5 MATI 2023**

MATAUPU: **O LE MANA O LE ATUA E TULI AI TEMONI**

SINI: Ia malamalama le vasega o le mana o le Atua, e mafai ai mea uma.

TUSI FAITAU: Luka 11: 14 – 23

FESOASOANI MO FAIAOGA:

E faatalofa i le tatou Vasega Feololo i lenei taeao fou, aemaise o le ulua'i Aso Sa o lenei masina. Talitonu le manatu o lo o manuia

uma i tatou i le alofa ma le agalelei o lo tatou Tapaaau Sili o i le lagi. O lea o le a faamatala le tatou tala, e pei ona faitauina mai le tatou Tusi faamamafaina o lenei taeao.

O le fesili, o le a le uiga o le upu mana? E mafai ona faapea o le mana e faatatau i le pule (*authority*), malosi (*power*). O lona uiga ua na o le Atua lava e i ai le mana e mafaia ai mea uma, e le o'o i ai le malosi o le tagata soifua. O le faitauga o lenei taeao o lo o aumai ai e le tusitala le faamalologa a Iesu e ala lea i le tulia i fafo o le temoni sa i le tasi tagata e le o ta'ua lona igoa i le tala. O le tagata sa faamālōlō, o le tagata gūgū. Peita'i na faamālōlōina e Iesu lona ma'i ma ua tautala.

Manatu foi o le ala lea na tu'ufesilisili ai tagata, pe mai fea le mana na tulia ai e Iesu le temoni mai fafo o le tagata ma'i. Ua i ai nisi fai mai o Pelesepulo; auā o Pelesepulo o le alii o temoni (*prince of demons*) e mafai foi ona faapea o le tupu o temoni. E i ai la le talitonuga, o le mana o Pelesepulo na tulia ai i fafo e Iesu le temoni. Peita'i lea lava ua faamanino mai i le tala e ala i le tali atu a Iesu, faapea mai "O mālō uma e fevaevaea'i, e faaumatia ia; e palasi i luga o fale. Afai foi e feavevaea'i Satani, pe faapefea ea ona tumau o lona mālō? Auā ua outou fai mai, o Pelesepulo e tulia ai e a'u o temoni".

O lona uiga lea lava ua saunoa manino le Alii Faaola, o le mālō o Satani e le o se malo e tumau, e le o se mālū ua maumaututū. E i ai le taimi e mavaevae ai, e i ai le taimi e talepeina ai. Ae ua na o le mālō o le Atua e tumau e o'o i le faavavau. O le Atua foi lena, o Ia e ala mai ai le mana ua fa'aaogaina e Iesu e tutuli ai temoni. O le mana e malolo ai le tagata o lo o manaomia le fesoasoani, o le mana foi e faaolaina ai i tatou.

Fai mai upu a le Alii Faaola, "A e afai o le aao o le Atua ou te tulia ai temoni, ua o'o mai lava ia te outou le mālō o le Atua". O lona uiga o le aao o le Atua, o lo o i ai le mana e tulia ai temoni, ua na o Ia foi o lo o i ai le pule ma le malosi silisili ese. E le o'o i ai le malosi ma le pule a Satani. O lona uiga e tatau i le tagata ona ia leoleoina o ia lava i le pule ma le mana o le Atua e fa'aolaina ai o ia, e pei ona a'oa'o mai ai o Iesu.

Tatou le fanau, e agalelei le Atua ia i tatou uma ma aso uma o lo tatou ola. O lona alofa mai, ua fusia ai i tatou uma, ua fa'aolaina ai le lalolagi atoa e ala i lona mana e tauto'aluaina ai o tatou tagata. O a faafitauali e tutupu ia i tatou i totonu o lou aiga, o le nu'u, le Eklesia, faapea ma aoga, e fesoasoani lava le mana o le Atua ia i tatou. A o'o foi ina a'afia i tatou i ma'i o le tino, e tausia i tatou i aao agalelei o lo tatou Alii; o lona lava mana lea ua tatou mālōlō ai.

Manuia outou le fanau i le alofa ma le agalelei o le Atua.

Uiga o Upu:

i)	temoni	—	o le isi lea igoa o le ti'apolo
ii)	pelesepulo	—	o le igoa o le ta'ita'i o temoni, ia po o Satani foi
iii)	gūgū	—	o le tagata ua le tautala
iv)	tofotofo	—	su'esu'e vale
v)	silafia	—	iloa
vi)	fevaevaea'i	—	taape solo, mavaevae.
v)	fa'aumatiā	—	fa'aleagaina, lepetia
vi)	palasi	—	pa'ū i lalo
vii)	a'uūpega	—	o mea tau e fa'aaoga i le taimi o le taua

GALUEGA FAATINO: Matematega

Manaia ae tapena e lau susuga i le faiaoga ni pepa A4, ona tusi lea i luga o upu e pei ona taua i luga, ia ma nisi upu fa'aopoopo mai le Tusi sa faitauina. Tufatufa lea i le vasega, ma mate mai po'o le a le uiga o upu e pei ona avatu i totonu o le fa'atinoga.

PESE: “O le Atua e Silisiliiese”

O le Atua e silisiliiese
E malosi toe mata'utia
E leai se mea e faigatā ona Ia faia
Na Ia faia vaitafe, mauga eleele ma le sami

O Ia foi na Ia faia mea uma i le lalolagi
O le Atua e paia e malosi toe mata'utia
E leai se mea faigata ona Ia faia

My God is so big, so strong and so mighty
There's nothing my God cannot do
My God is so big, so strong and so mighty
There's nothing my God cannot do
He made the trees
He made the seas
He made the elephants too
My God is so big, so strong and so mighty
There's nothing my God cannot do

My God is so great, so strong and so mighty
There's nothing my God cannot do
My God is so great, so strong and so mighty
There's nothing my God cannot do
The mountains are His
The rivers are His
The skies are His handy works too
My God is so great, so strong and so mighty
There's nothing my God cannot do

A'OA'OGA:

1. O le mana o le Atua e faamaloloina ai i tatou
 2. E leai se mea e faigata i le Atua
 3. E mafai e le Atua mea uma
-

ASO SA:

12 MATI 2023

MATAUPU:

UA FA'ASAOINA IAPESE

SINI:

Ia malamalama le vasega, e saunia e le Atua ala e faasaoina ai ē o lo o mana'omia le fesoasoani.

TUSI FAITAU: 1 Samuelu 11: 1 – 11

FESOASOANI MO FAIAOGA:

O Iapese o le taulaga po'o le nu'u fo'i, e i le itu i Sisifo o le vai o Ioritana. O le molimau lava ia a le Tusi Paia i le Tusi o Faamasino ma Nofoaiga Tupu, o Iapese ma le fa'alaua'iteleina o lona mālō, pe tusa lea ma le afa o le fuainumera o le faitau aofa'i o le ituaiga o Manase. E faapena foi la i le ituaiga o Kato ma le ituaiga o Reupena, o lona uiga la, o tagata o Iapese o tagata lava e tupuga mai le nuu o le Atua.

Manatu foi ai o le ala lea o le ita faaumiumi o Naasa aemaise o tagata o Amoni, i tagata o Iapese. Auā a toe foi le tala i tua i le taimi o Faamasino o lo o ta'ua ai le fasiga e tagata o Amoni o le nuu o Isaraelu. Ma e i ai le talitonuga e tupu pea le feitaga'i, ma le naunauta'iga ina ia fa'aumatia atoa nuu uma o Isaraelu aemaise o taulaga e latalata ane iai. Lea la ua a'e ai ma le manatu ia Naasa e tatau ona faaumatio Iapese. A o tagata o Iapese e le mafai ona latou tauina le taua ma Amoni.

Lea la ua alu ai ma le sāvali ia Saulo le tupu o Isaraelu, ina ia alofagia lo latou mafatiaga. Aemaise o se faiga faa lē alofa lea o le a faia e Amoni mo tagata o Iapese. E le faigofie lenei fa'aiuga ua aumai, peita'i e eseese lava auala e saunia e le Atua e fa'asaoina ai le tagata. Fai mai ina ua logo tala Saulo i le mea ua tupu, ona osofia lea o ia e le Agaga o le Alii ma ua tupu tele ai lona ita ia Amoni. O le mea moni e lē i nofonofo Saulo ae na ia ofo atu lana fesoasoani mo tagata o Iapese; ua tapena ana 'au tau uma ua faitaulia le 300,000 o le fanauga a Isaraelu ma le 30,000 o tagata o Iuta.

Ua tapena le vaega'au a Saulo, ma ua logoina Iapese uma lava, o le aso a taeao o le a o'o ai le fa'aolataga mo latou. Lea lava na fa'ataunuina, ma ua fa'asaoina tagata o Iapese mai le lima o le

nu'u o Amoni, ma na fasia ai e Saulo ma ana 'au. Fai mai le tala, na vaevae i vaega e tolu lana vaega'au ona fa'ata'amilo lea i totonu o le vao i le vaega o lo o to lauapi ai Amoni uma, ma fafasi ia te i latou.

Tatou le fanau, e eseese lava auala e o'o mai ai le faaolataga a le Atua i le tagata. O a ni taupulepulega a se tasi tagata e faia i le isi, e i ai lava auala e tapenaina e lavea'i ai le soifua ma le ola. O ai foi o lo o manaomia se fesoasoani, tatou te tu'u atu le tauau e tausoa le avega. Ofo atu lau fesoasoani, atonu e itiiti ma fa'atauvaa ae mafai ai ona fa'asaoina le soifua o lena tagata o lo o mana'omia. O lou sau i le Aoga Aso Sa, o le a'oa'oina lea o tala tau ia Iesu. O le Tala Lelei foi lena e te ta'u atu i lau uo, o lou fa'asoa atu o tala tau ia Iesu Keriso.

Manuia outou le fanau i le alofa ma le agalelei o le Atua.

Uiga o Upu:

- | | | | |
|------|-------------|---|---------------------------|
| i) | sāvali | - | o se feau po o se poloa'i |
| ii) | osofia | - | musumusuina, faatonutonu |
| iii) | fa'aolataga | - | faasaoina, faolaina |

GALUEGA FAATINO: Fa'atalatalanoaga

Vaevae le vasega i ni vaega se tolu pe fa foi. Ona fa'atalatalanoa lea o le mataupu ma fa'asoa ai le tama ma le teine Aoga Aso Sa, po'o a ni auala na mafai ai ona e ofo atu ai se fesoasoani mo se isi. Mo se fa'ata'ita'iga: o lou alu lea i le aoga, ae alu atu lau uo ia te oe i se

PESE: Fa'alagolago i aao o Iesu

Le mafutaga fafia e le mafai tuaoia
Faalagolago i aao Iesu
E maua ai le manuia
Ia Iesu o le Mesia
Faalagolago i aao o Iesu

Tali:

Faalagolago, faalagolago
Faalagolago i aao o Iesu x2

A'OA'OGA:

1. E alofa le Atua ia i tatou uma
 2. Ofo atu lau fesoasoani mo ē o lo o manaomia le fesoasoani
 3. Aua le faamaualuga
-

ASO SA:**19 MATI 2023****MATAUPU:****UA FA'ASA'OLOTO PETERU MAI LE FALE PUIPUI****SINI:**

Ia malamalama le vasega, e mata'utia ma silisili ese le Atua.

TUSI FAITAU: Galuega 12: 6 - 11**FESOASOANI MO LE FAIAOGA:**

O le fa'asa'oloto o le tatalaina, pe mafai foi ona fa'apea o le sa'olotoga ua tu'u atu i se tagata sa saisaitia i lalo o le puleaga malosi a se isi tagata. E pei foi la ona i ai le mataupu a le tatou vasega i lenei taeao. E ui lava la o le sa'olotoga lava ia ona o se malosi e sili atu o lo o e saisaitia ai, peita'i o le sa'olotoga o lo o ttau i le tatou tala, o le sa'olotoga na tapenaina ma saunia e le Atua. E pei ona fa'asa'oloto ai Peteru mai le tale puipui.

O le fesili fa'atupu manatu mo i tatou le fanau i lenei taeao, aisea ua fa'a pale puipuiina ai Peteru? O le vaitau tonu lava lea o le malosi o sauaga mo le au kerisiano, aemaise o le tapu'eina o le au soo o Iesu ma tu'uina atu i le tale puipui. O le taimi foi lea i le

tula'i mai o Herota le ta'ita'i leaga, o ia fo'i sa ia pulea Iutaia. Lea lava na fa'atino lana fa'amasinoga ma tu'uina atu ai loa Peteru i le tale puipui.

Fai mai le tala ua noanoa o ia i maea u'amea e lua ma tu'uina atu i le tale puipui. Ua leoleoina le tale puipui, ma o le mea mautinoa e le mafai lava ona toe sola ese Peteru pe a fua atu i le tala. Peita'i, o se mea uiga ese na tupu i le tale puipui ua fafaguina e le agelu Peteru ua ia tula'i i luga, fai mai ona pa'uū ai lea o u'amea sa nonoa ai ona lima. O le mea moni, e i ai le manatu o le au suesue o le Tusi Paia, e i ai le mau fa'apea mai, e le i iloa e Peteru le mea sa tupu. E pei o se miti a Peteru o lo o fai, e mafai foi ona faapea o lo o i le Agaga o ia. E mafai ona lagolagoina le mau lea i le fuaiupu e 9 o le tatou Tusi Faitau faapea mai "Ona alu lea o ia i fafo, ua mulimuli atu ia te ia; ua le iloa e ia ua moni le mea ua faia e le agelu; fa te ia ua vaaia se faaaliga"

O se vaaiga matautia lenei i le fa'asa'olotoina o Peteru mai le tale puipui. E tusa o le molimau a le Tusi o Galuega, pe a ma le tolu faitoto'a o le tale puipui ma e tofu foi faitoto'a ma leoleo o lo o latou leoleoina. Ae o le faitotoa mulimuli o le faitoto'a u'amea e matua'i le mafai lava ona sao ai se tasi i fafo. Ui i lea, tapenaina e le Atua so o se auala, e le gata o le agelu na ia fafagu ma ta'ita'i mai Peteru mai fafo o le tale puipui, a o vavega lava na tutupu e fa'aalia ai le mamalu silisili ese o le Atua.

Le mamalu ma le matautia lea o le Atua na molimauina e Peteru, ua faasaoloto mai ai o ia mai le tale puipui. Le tatou vasega i lenei taeao, o a o tatou vaivaiga, o mafatiaga o feagai ma i tatou; e tali faaaliali lava le Atua. E faasaoloto e le Atua i tatou mai ni mea o lo o saisaitia ai i lenei lalolagi. Galuega a le fili e taumafai e lepeti lo tatou ola taumafai mo Keriso, a o le Atua e na te faasaoloto i tatou e ala i lona alofa tunoa mo oe ma a'u ma i tatou uma.

Uiga o Upu ma Fuaitau:

i) noanoatia – saisaitia

- ii) pulupulu – ofu po o le faamafanafanaina
- iii) fa'aaliga – fa'aali mai po o se pupula uiga ese o lo o i se tagata. E mafai foi ona faamatalaina o se miti.
- iv) mua'i leoleoga – o lo o fa'atatau i le ulua'i faitotoa po o le pa puipui sa leoleo ai fitafita i le fale puipui, mo le faa fale puipuina o Peteru

GALUEGA FAATINO: Fa'atino le tala (Role play)

Filifili e lau susuga ni tamaiti e faatinoina le tala, e atagia mai ai le uiga o le mataupu, faasaoloto mai le fale puipui.

PESE: Mamalu lava lau Afio (fati: *Hallelujah by Leonard Cohen*)

Paia ma mamalu lava lau Afio
 E ou le mana le malosi uma lava
 E silisili lava oe i mea uma
 Na e tatala o'u noanoataga
 Ua e fusia a'u ma faamafanafana
 Ua e fa'asa'oloto a'u mai le leaga

Tali:

Aleluia, Aleluia
 Aleluia, Aleluia

A'OA'OGA:

1. O le Atua lava e na te faasaolotoina i tatou mai i o tatou mafatiaga.
 2. E le tuulafoaiina e le Atua ona tagata.
 3. Aua le manatu faapito.
-

- | | |
|---------------------|--|
| ASO SA: | 26 MATI 2023 |
| MATAUPU: | UA FINAU AFAFINE O SELOFEATA MO SO LATOU TOFI |
| SINI: | Ia malamalama le vasega, o le ola finau o afafine o Selofeata na maua ai lo latou tofi |
| TUSI FAITAU: | Numera 27: 1 – 11 |

FESOOASOANI MO LE FAIAOGA:

O ai Selofeata e pei ona ta'ua mai le tatou mataupu? O Selofeata e mai le ituaiga o Manase ma e to'alima lana fanau teine o Maala, Noa, Hakelu, Maleka ma Tiresa. E leai so latou tuagane e na o teine lava i latou e tusa o le molimau a le Tusi Paia. Peita'i ina ua maliu lo latou tamā, sa leai se fa'amoemoega i teine nei. Auā o le mea moni, e tusa o le tulafono faa Eperu, a maliu le tamā ona ui mai lea i le ulumatua o le aiga pe afai o se tama, o ia lena e na te mauaina faamanuiaga.

A o le fa'afitauli tele lea ua tula'i mai i le tala, e na o teine le fanau a Selofeata, o le mea moni e leai so latou tofi. Ui lea, sa finau lava afafine o Selofeata mo so latou tofi lea lava sa o latou fesiligia ai Mose. Fai mai le fuaiupu e 4 “Pe tineia i se a le igoa o lo matou tamā i lona aiga, ina ua leai sona atalii? Ina au mai ia ia te i matou so matou fanua faatasi ma le au uso o lo matou tamā” O le finau lea a afafine o Selofeata ia Mose ua o latou fesiligia ai le tulafono, pe aisea o le a aveesea ai le igoa o lo latou tama.

Aua o le uiga lea o le upu tineia e pei ona taua i le fuaiupu e 4, (*be taken away*) o lona uiga aveesea po o le aveeseina. O faamanuiaga uma a Selofeata, o lona fanua o lona tofi, o lona uiga o le a aveeseina auā e leai sona atalii e tusa lava pe na o teine lana fanau. A o le uiga lena o le finau atu a tama'ita'i nei e pei ona taua i le tala. O le a le tali a Mose i le fanau a Selofeata? “Ona avatu ai lea e Mose o la latou upu i luma o le Atua” Na fesili lava Mose i le Atua mo se tali, a lea na manino le fetalaiga a le Atua faapea mai “E tonu upu a afafine o Selofeata, e te avatu

lava ia te i latou so latou lava tofi faatasi ma le au uso o lo latou tama, e te tuuina atu ia te i latou le tofi o lo latou tama”.

Tatou le fanau e taua ia o lou ola finau i lau aoga aemaise so o se tofiga ua tofia ai oe. E ala i lau aoga, ta’aloga ia ma isi mea. O le ola finau i mea lelei ae le o mea lē aogā. Ae tatou te faamoemoe pea i le Agaga o le Atua, e manuia ai lou taumafai, e manuia ai lau aoga. O le taui lena o le ola finau, pe afai tatou faamoemoe ma faatuatua ia te Ia.

Uiga o Upu:

- i) tineia – aveesea, faaleagaina
- ii) poloa’i – o se feau

GALUEGA FAATINO: Taligā Fesili

1. E to’afia le fanau a Selofeata? O ai o latou igoa?

Tali: E to’alima. O Maala, Noa, Hakelu, Maleka ma Tiresa

2. O ai le ituaiga o Isaraelu e sau ai Selofeata?

Tali: O Manase

3. Aisea ua manana’o ai afafine o Selofeata mo so latou tofi?

Tali: Ina ua maliu lo latou tamā; ne’i tineia lona igoa i totonu o lo latou aiga. O le isi itu e leai so latou tuagane; le ala lea na o latou fesiliglia ai Mose mo so latou fanua.

4. O fea na maliu ai Selofeata?

Tali: Na maliu i totonu o le vao i le taimi o le malaga fa’iumumi a Isaraelu

5. Fa’apefea ona maua le tofi o afafine o Selofeata?

Tali: O le ola finau ma le loto saili o tama’ita’i nei na maua ai lo latou tofi. Sa o latou tutū i luma o Mose ma Eleasar le ositaulaga aemaise le nuu atoa. Na o latou fesiligliaina ai

so latou fanua aemaise o le tofi mo le latou tama. Peita’i na avatu e Mose i luma o le Atua la latou mataupu e uiga i le fanua, lea lava tali fa’aliali le Atua, e tatau lava ona maua le tofi mo le fanau a Selofeata.

PESE:

I love You, You love Me from Barney TV show

I love you
You love me
We’re a happy family
With a great big hug
And a kiss from me to you
Won’t you say you love me too?

I love you
You love me
We’re best friends
Like friends should be
With a great big hug
And a kiss from me to you
Won’t you say you love me too?

A’OA’OGA

1. Ia fifia e finau i mea lelei
 2. O le ola finau e fa’apaleina i manuia
 3. Fa’amoemoe i le Alii e manuia ai le taumafai
-

MANATU TAIALA O APERILA:

“IA ONOSAI I FAIGATA O LE ALA”.

I le olaga nei e i ai taimi e solo lelei ai, e i ai foi taimi e lutia ai i tatou i faigata o le ola. I le taimi nei, lea ua tatou pagatia i le faamai oti o le Koviti 19. O se faamai e tuai ona tineia, peitai, aua nei avea lea ma ala e vaivai ai lo tatou ola saili ma faatuatua pea i

le Atua. Ia tatou lototetele, onosai, anapogi ma tatalo pea i le Atua e le aunoa, aua e pule lava le Atua i mea uma, e oo a i le ola o le tagata na ia faia.

ASO SA: **2 APERILA 2023 (Aso Sa Laupama)**

MATAUPU: **O LE MALAGA A LE TUPU O TUPU.**

SINI: Ia malamalama le vasega, o le malaga a Iesu i Ierusalem, o le malaga o le manumalo, (triumphant entry), o le faailoga o Ia lava o le tupu o tupu.

TUSI FAITAU: Mataio 21:1-11

FESOASOANI MO FAIAOGA:

E eseese lava faamoemoega o so o se faigamalaga i le lalolagi o i ai nei. O nisi e malaga e tafafao (vacation), o nisi e malaga e asiasi i aiga, o nisi e o i ni maliu po o ni aso fanau, ia po o ni faaipoipoga foi, ia ma isi lava mau mafuaaga eseese.

Peitai, o le faamoemoe o le malaga a Iesu i Ierusalem, ina ia taualuga ai lana galuega faa-misionare na afio mai ai i le lalolagi, e ala i lona maliu ma ofoina mai lona soifua atoatoa e togiola ai le laloagi agasala. Le eseesege lea o tupu o lenei lalolagi ma Iesu le Tupu o tupu, aua e le mafai e se tupu i lenei lalolagi ona ofoina mai sona ola e faamagalo ai ni tagata agasala. O le uiga lea o le upu tupu o tupu, o le tupu e sili atu nai lo o tupu uma o le lalolagi.

E tele vavega eseese na faia e Iesu, e saga faamanino atili mai ai pea ia i tatou, o Ia lava o le tupu o tupu. E le mafaia e se isi lava tupu ona ia faia nei mea uma. Sa ia tala'i le finagalo o lona Tamā ma le uiga o le malo i le lagi, sa ia faamalolo i e mamai, sa ia fafaga i le motu o tagata e toatele, ma sa ia toe faatutuina mai tagata ua foeti. Sa sauaina o Ia, sa inosiaina ma tauemu i ai tagata, ae sa ia onosai lava i fita ma faigata i le ala e oo lava foi i

lona maliu ma lona toetu manumalo mai le oti ma le tuugamau, ua lava lea tatou te mautinoa ai e moni a o Iesu lava o Ia o le tupu o tupu.

O se fafagu mai foi lea mo i tatou le fanau o le tatou mataupu o lenei taeao. Ia tatou savavali ma malaga faatasi ma Iesu i taimi uma, ‘aua tatou te faagalo le tupu o tupu, a ia fai pea o Ia ma ta’ita’i malaga i la tatou folaua i lenei tausaga. Ia tatou loto alolofa i e vaivai ma e o mafatia, ta’uta’u atu le finagalo o le Atua i e o lo o pogisa pea, auauna faamaoni i so o se valaauna ma so o se tofiga ua tofia ai tatou, ia tatou usitai i o tatou matua ma toaga i le lotu, aoga Aso Sa, ma aoaoga o le poto salalau, ma toaga e tatalo. Ia tatou malaga faatasi ma le tupu o tupu, e taunu ai tatou i faamanuiaga e tele e oo a i le ola e faavavau.

Uiga o Upu:

- | | | | |
|------|----------|---|--|
| i) | sala | - | tipi ese (cut off) |
| ii) | osana | - | laveai matou (a sound of praise) |
| iii) | Perofeta | - | auauna a le Atua.
(One who foretells future events) |

GALUEGA FAATINO : FAATINOGA :

Faatino le tala e pei ona aumai i le Tusi faitau.

PESE : Osana pepese tamaiti uma...

A’OA’OGA:

1. Ia onosai i faigata o le ola.
2. Savavali faatasi ma le Alii i taimi uma.

.....

ASO SA : **9 APERILA 2023. (Aso Sa Toetu)**

MATAUPU : **E MANUMALO IESU I LE OTI**

SINI: Ia malamalama le vasega, e ui ina maliu Iesu, ae na toetu mai o Ia mai le tuugamau.

TUSI FAITAU: Mataio 28:1-10.

FESOASOANI MO FAIAOGA:

O le o atu ai o Maria le makatala ma le isi Maria e asi le tuugamau o Iesu, na faafuasei ona to se mafuie tele ma alu ane ai le agelu ua fuli ese le maa na pupuni ai le gutu o le tuugamau o Iesu. Na matua matata'u i laua nei, aemaise o e na leoleo i le tuugamau, fai mai ua liua i latou e pei o tagata ua oti. Peitai na faailoa manino e le agelu ia Maria ma Maria e aua la te matatau. Ua Toetu Iesu. A ia la o atu ma tau atu i ona uso po o ona soo ua toe tu mai o Ia e pei ona sa ia fetalai atu ai ia tei latou. E muamua atu foi o Ia i Kalilaia latou te feiloai ai mai latou. O le ata manino lea o le manumalo o Iesu i le oti aua ua toe soifua mai o Ia. E le mafai e le oti ona faatoilaloina o Ia. O i foi lea ua momoli mai ai ia i tatou ni feau taua. (1) Aua le fefe a ia fafia ua toetu Iesu, (2) E leo i inei o Ia o lona uiga e leo toe i ai o Ia i le tuugamau, (3) O atu vave ma tau atu, tau atu le Talalelei ua Toetu Iesu.

O le fulieseina e le agelu o le maa sa pupuni ai le tuugamau, o le faailoga ina ia mafai e tina na o atu e asi Iesu ona la molimau ai lea ua le o i ai Iesu i le tuugamau a ua toetu o Ia. E taua tele le molimau a nei tinā e pei ona fetalai i ai le agelu e o atu e tau atu i soo o Iesu, ua toetu pe ua manumalo Iesu i le oti. O le ‘auga foi lea o lo tatou ola faatuatua. Ia tatou mautinoa e i ai le faamoemoe mo le toetutu o i tatou pe a mavae le ola nei. O se feau faamalosi foi lea mo i tatou o le fanau. Ia tatou fafia ma olioli ua manumalo Iesu i le oti. O le faailoga foi lea o le tatou manumalo faapei o Iesu pe afai tatou te talitonu ma tutumau i le faatuatua i lea manumalo, tatou te mafai ai ona tatou manumalo faatasi ai ma

Ia ma tatou saofaga ai i le ola e faavavau. Aua nei faavaivaia gofie i tatou e le fili ma ana togafiti a ia tatou tutumau pea i le Tala Lelei e pei ona uluai tauina e le agelu i tinā ia la o atu ma tau atu i ona soo ua toetu Iesu ia po ua manumalo Iesu i le oti. Tatou tutumau nei loa i le tatou faatuatua ma le tatou molimau ua Toetu po ua manumalo Iesu i le oti.

Uiga o Upu:

- | | | | |
|------|----------------|---|------------------------------------|
| i) | Maria Makatala | - | fafine mai le nuu o Makatala. |
| ii) | sinasina | - | paepaema
(as white as the snow) |
| iii) | tetemu | - | fefefe (shock) |

GALUEGA FAATINO : FAATINOGA

Faatino le tala o le Toetu.

PESE : Pese ma Viiga 51.....

A'OA'OGA:

1. Ia fai i tatou ma avefeau o le talalelei ia Iesu.
 2. Ua faatoilalo e Iesu le oti.
 3. Ia molimau ma faailoa atu Iesu Toetu.
-

ASO SA: **16 APERILA 2023.**

MATAUPU: **O LE ALOFA O LE ATUA**

SINI: Ia malamalama le vasega i le tēlē o le alofa o le Atua mo i tatou.

TUSI FAITAU: Roma 8 : 32-35.

FESOASOANI MO FAIAOGA:

Tamaiti, o ai na te iloaina po o le a lea upu ua ta'ua o le alofa? Ioe, O le alofa (love) o se faalogona malosi (emotional feeling) e tupu ae i totonus o le loto o le tagata, e mafua ai ona agalelei atu le isi i le tasi, ma naunau ai e ofo atu so o se auaunaga po o so o se mea lelei lava e faatino ai lona alofa i se ua ia alofa i ai.

O le fesili, O ai se tamaitiiti e na te iloaina e alofa faamaoni ona matua ia te ia? Ioe e faapena uma lava i tatou, ua tatou iloa lelei le alolofa o o tatou matua ia i tatou a tamaiti. O matua e tausia i tatou, fafaga mai lava a o pepe, faa lavalava, tausi, ave i le falemai pe a mama'i tatou, ave i aoga ina ia maua e tatou le poto e oo mai lava i le taimi nei a tamaiti, ma o lo o fa'aauau pea lava le tausiga a nai o tatou matua seia oo a ina valaau mai le Atua ia i tatou a tamaiti.

Peitai e sili atu la le alofa o le Atua mo'i tatou tamaiti. Ua tatou iloa lea mai le tusi sa o tatou fai tauina. I le fuaiupu e 32 ma le 34 lea o lo o ta'u manino mai ai lava, le alofa silisilise o le Atua mo i tatou, ua ia ofoina mai ai lona lava ola mo i tatou. E ui la ina feagai pea tagata kerisiano ma faigata i le tele o taimi, peitai e le mafaia e ia mea ona aveesea mai ai i tatou mai le alofa o le Atua mo i tatou.

O le feau foi lea ma se aoaoga ua faailoa mai e le aposetolo o Paulo mo le tatou mataupu i lenei taeao. Ta'ua e Paulo o le oo mai o puapuaga ma faigata i e faatuatua, o se auala lea e alagatatau ai ona atili faamalosia i tatou ina ia tatou naunau tatou te mafuta ma le Atua, ia oo mai lona alofa laveai mo i tatou, ma, o i tonu foi e saga faamausaliina ai ma atili vavalalata ai la tatou sootaga ma le Atua.

O le upu moni e le mafai lava e se mea e tasi e pei ona ta'ua ona aveesea mai le alofa o le Atua mo i tatou. Le alofa lea e mafai ai ona o tatou manumalo ai faatasi ma Ia i le ola e faavavau. Lea a na faatino ai e Iesu le faaolataga mo le lalolagi uma. Ioe, e leai lava se isi alofa e sili i lo o lenei alofa, ina ua ia ofoina mai lona ola e sui ai i tatou.

GALUEGA FAATINO: FETUFAAIGA.

Vaevae le vasega i vaega e lua, vaega muamua e tali maia le fesili muamua, vaega e lua o le fesili e lua.

- (1) Faailoa mai pe faapeflea ona iloa le alofa o le Atua mo i tatou?
- (2) Faailoa mai po o a ni auala a le tiapolo e taumafai e aveesea mai i tatou mai le alofa o le Atua?

PESE : E le alofa o Iesu (73 Pese ma Viiga)

A'OA'OGA:

1. Ia fafia e mafuta i le Atua i taimi uma i le tatalo.
 2. Toaga i le lotu ma mea fai a le Eklesia.
 3. Ia alofa i so o se tagata.
-

ASO SA : **23 APERILA 2023.**

MATAUPU: **IA ILOA LE VA MA LE ATUA.**

SINI: Ia malamalamā le vasega, o le tatou alolofa ma iloa faamaulalo i isi tagata, o lo tatou iloa lava lea o le Atua.

TUSI FAITAU: Iopu 42:1-6.

FESOASOANI MO FAIAOGA :

A tatou talanoa loa i le tala ia Iopu, ona tatou manatua lea, o Iopu o se tagata ua sao lana amio ma amiontu i luma o le Atua ma aloaloese i mea leaga. Peitai na oo lava ia te ia puapuaga, i le faatagaina ai e le Atua o Satani na te faaoo le leaga ia Iopu, lea na aveesea ai ona tamaoaiga, o ana fanau, ma iu ai lava ina maua ai

o ia i le mai papala. Ae ui a ia mea uma ae sa mau pea le toovae ma le onosai o Iopu, aemaise o lona faatuatua i le Atua. Sa i ai taimi na atagia ai ua pei ua sa'i Iopu i le Atua, ona o lona le malamalama i le va o le tagata ma le Atua. Ae peitai, na toe faamanuiaina a e le Atua Iopu i famanuiaga e sili atu i lo o mea sa īā Iopu i le taimi muamua.

I le vaega la o le tusi sa faitauina ua tautino ai e Iopu lona sese ma lona fatuvaā i luma o le Atua, ina ua faailoa manino e le Atua ia Iopu le eseeseaga o le va o le tagata ma le Atua. O lea ua silafia e Iopu o le Atua lava e pule aoao i mea uma o le ola nei, o le Atua foi o loo i ai le faamasinoga tonu, e le fessiliglia pe suesueina e se tasi le Atua. Fai mai a ia sa ou faalogo i le faalogo a ou taliga, a o lenei ua vaai atu ou mata ia te Oe, ma ua ia faamaulalo ai i le Atua, aua ua ia lagonaina lona faatauvaa ma lona sese i lo la va feagai ai ma le Atua.

E oo lava foi i uo a Iopu, sa sili lo latou le malamalama i le tulaga ua iai Iopu aemaise o le va feagai ai ma le Atua. Mulimuli ane na faailoa iai e le Atua ua tele lo latou sese i lo latou le malamalama, ma o le ala lea e tatau ai ona latou ave ni povī se fitu ma ni mamoe se fitu e osi ai le taulaga i le Atua ma ia tatalo Iopu mo i latou ina ia faamagaloina i latou, a leai, o lona uiga, o le a oo le malaia ia i latou uma.

Ioe tamaiti, e tatau ona iloa e i tatou uma ona o tatou ava ma matata'u i le Atua. Ia tatou alolofa i isi tagata, ma usitai i le finagalo o le Atua, ae aua nei tatou fesiliglia le Atua, aua lea faimai Isaia, 55:8 (faapei ona maualuga o le lagi i le lalolagi, e faapena ona maualuga ou ala i o outou ala, ma ou manatu e sili i o outou manatu) ua fetalai mai ai le Atua.

Uiga o Upu:

- i) vaoia - taofia (thwarted)
- ii) faapouliuligia - faapogisaina (obscures)

GALUEGA FAATINO : TUSIGA SOLO/PESE.

Tusi mai sau solo po o sau pese e faatatau i le manatu autu: **Ia mata'u i le Atua Pule Aao**. (ia lua pe tolu fuaiupu le umi tai fa laina i le fuaiupu e tasi). A maea ona faasolo lea e toe faitau mai a latou solo ma pese.

PESE : Le alofa o le Atua e ofoofogia....

A'OA'OGA :

1. O le pule a le Atua e silisiliise lea.
 2. Ia usitai tagata uma i le finagalo o le Atua.
 3. Ia tumau tumau i le Atua i taimi uma.
-

ASO SA: **30 APERILA 2023.**

MATAUPU: **O AI LOU ATUA?**

SINI: Ia malamalama le vasega, o le Atua o Ia lava o lo tatou laveai, ua tatou maua ai le ola, ma famanuiaga e tele.

TUSI FAITAU: Salamo 18: 2-5

FESOASOANI MO FAIAOGA:

E taua lo tatou malamalama lelei ma tatou iloa tonu natura o le Alii lo tatou Atua. Ia tatou iloa ai ona auauna, vivii ma taupuai ia te Ia, aua e tatau ona o tatou vivii ma auauna ma tapuai ia te Ia i le Agaga ma le faamaoni.

O le vaitau o le gagaifo o le la po o le matua ai o le soifua o Tavita lea sa avea ma tupu o Isaraelu, na ia tusia ai lana Salamo lea sa tatou faitau i ai. O le Salamo po o le pese a Tavita e viia ai ma faafetaia ai le alofa ma le tausiga agalelei a le Atua i lona soifua ma le ola. Aua a fua i ai e Tavita i le tele o faigata aemaise

o taua sa feagai ma ia, e le gata i le puipuiga o lona nuu mai nuu tuaoi, a o tagata taitoatasi foi sa lamalama e faaoo le oti ia Tavita e pei foi o Saulo, peitai sa puipuiina pea e le Atua Tavita mai le tele o ona fili. O le ala lea o le lē uma ai pea o lona fia vivii ma pese faafetai i le Atua ona o lana tausiga le mavae mo ia.

E lima ni vaega taua ua faatusaina i ai e Tavita i lona foi silafia ma ona foi saafiafiaga i le Alii le Atua. Muamua, o le Atua o lona papa, o le papa e lē mafai ona maluelue pe aveseina e se tasi, lona lua, o le Atua o lona faaola, e le mafai e le fili ona oo atu iai, lona tolu, o le Atua o lona talita, e puipuia ai o ia mai le ono afaina i aupega a le fili, lona fa, o le Atua o le nifo o lona olataga, o le faailoga o le mamalu matautia ma le malosi o le Atua, ma lona lima, o le Atua o lona olo maualuga, e le mafai ona oo atu ai ona fili ia te ia.

O le vaai lea a Tavita i le Alii lo tatou Atua. O ona saafiafiga foi ia ina ua afu lelea lana tautua i le Atua e ala i le taitaiga o lona nuu mai tausaga pe tusa ma le fa sefulu na fai ai o ia ma tupu, (1 Nofoaga a Tupu 3:4-5).

E maeu le alofa o le Atua ia Tavita lana auauna. E faapena foi le alofa mai o le Atua ia i tatou o lana fanau. O le ala lea e tatau ai foi ona tatou faafoi le viiga ma le faafetai i le Atua i aso uma e le aunoa ona o lana tausiga ma lana puipuiga ia i tatou. Ia tatou iloa lelei lo tatou Atua e pei ona iloa lelei ma mafana le mafutaga a Tavita ma le Atua. Ia tatou iloa lelei o Ia o le Atua faamagalo, o Ia o le tatou olo, o le tatou faaola, o le Ia o le tatou laveai, ma le puna o faamanuiga mo i tatou. O Ia o le Atua o le alofa ma le faapogai o lo tatou ola.

GALUEGA FAATINO : TUSITUSIGA.

Tusi mai sau palakalafa (paragraph) se tasi, lima i le ono fuaiupu le umi, e faamatala mai ai, po o le a lou iloa, o ai le Atua, o Lē ua tatou tapuai ma auauna i ai.

PESE: O lo'u Atua e telē. (My God is so big)

A'OA'OGA :

1. Ia tatou auauna ma le faamaoni i le Atua.
2. E silisilise ma mamalu le Atua.
3. Ia toaga i le lotu ma le aoga Aso Sa.
.....

MANATU TAIALA O ME: O LE AGALELEI O LE ATUA

E silisilise le mamalu o le Atua. O lo o manino ma iloa i le siosiomaga o lo o tatou ola ai, auā o lo o fa'aalia ai lona agalelei i aso uma o lo tatou ola. O le fesili, e tatau lava ona o tatou iloa ma malamalamama i lea agalelei, ma tatou ola ai i aso uma.

ASO SA: **7 ME 2023**

MATAUPU: **UA AGALELEI LE ATUA IA IONA**

SINI: Ia malamalamama le vasega, e agalelei pea le Atua i le tagata lē usitai.

TUSI FAITAU: Iona 2: 1 – 10

FESOASOANI MO FAIAOGA:

E manatu ua masani le fanau i le tala ia Iona. E lelei pe a amata le mataupu i ni fesili faamanatu ai le tala ia Iona e.g.

1. O ai foi Iona?

Tali: Perofeta

2. O le a le mea na tupu ia Iona?

Tali: Sa folo e le i'a.

3. O ai Nineva?

Tali: O le nuu lea na poloa'i ai le Atua ia Iona e alu i ai.

4. O le a le umi na i ai Iona i le manava o le i'a?

Tali: 3 po, 3 ao.

E taua tele tamaiti le faalogo ma usitai. O le tala sa faitauina, o le taimi tonu lea o lo o i ai Iona i totonu o le manava o le i'a. Ae mafua ona oo i ai puapuaga ia Iona, ona o le lē usitai ma faalogo i le Atua. E 3 po, 3 ao, o i ai Iona i totonu o le manava o le i'a. Ua lagona e Iona le leaga o lana mea ua fai. Ua avea le musu e faaoo le finagalo o le Atua i Nineva ma mafuaaga ua oo ai faigata ia te ia.

Ua iloa lelei e Iona, e leai lava se isi e mafai ona faaolaina o ia mai le manava o le i'a, ua na o le Atua. O lea sa ia tatalo ai i le Alii ina ia faaolaina o ia. E tele mea e ono tutupu mai ona o le lē usitai o Iona. O le i ai o Iona i le vaa, se manu a feoti ai le auvaa. O le musu foi o Iona e momoli le faaolataga i Nineva ona o le alofa faapalepale o le Atua, semanu a faaumattia ai Nineva. A o le i ai o Iona i ona puapuaga na ia lagonaina ai lona salamo i luma o le Atua. A o le feau foi lea mo Nineva na finagalo ai le Atua. Ia salamo ona o le agasala.

Ua iloa ma malamalamā Iona o lona i ai i totonu o le manava o le i'a, o lona taunuuga lava o le oti. E leai se tagata e mafai ona ola i totonu o le manava o se i'a. Ae afai foi e sao mai Iona i fafo o le manava o le i'a, e mautinoa lava e malemo ona o le sousou ma le loloto o le sami. Ae ona o Iona o le tagata na valaauiina e le Atua, o ia foi o le tagata faatuatua, ma mafua ai ona faaolaina e le Alii.

Ae ese foi le taua o le mea na faia e Iona na maua ai lona lavea'iina. O le a le mea na fai e Iona tamaiti? O le tatalo. Fai mai Iona, "**Na ou valaaau atu i le Alii ona o lo'u puapuaga, na ia faafogoga mai foi ia te a'u.**"

Po o lava mea e tutupu mai i le olaga, o faigata ma tiga, aua lava nei mapu le tatalo. Aua i totonu o faigata ma tiga o lo o i ai le Atua. (In the midst of our trials and tribulations, God is there)

Tamaiti po o le a lava lo outou le usitai ma faalogotata i matua e alofa ma agalelei pea matua ia te outou. E faapena Iona. E ui ina

le usitai i le Atua na mafua ai ona oo i puapuaga, ae na agalelei lava le Alii ia te ia. Ua faafogoga le Alii i le tatalo a Iona, ona sao mai ai lea o Iona i fafo o le manava o le i'a ma mapu atu ai Iona i le eleele matutu.

E ese le agalelei o le Atua i le tagata agasala, na mafua ai ona afio mai Iesu i le lalolagi ina ia faaolaina.

GALUEGA FAATINO: Faaliliuina (Translation)

Faaliliu mai le fuaiupu faa-Peretania lea i le gagana Samoa.

"For God so loved the world that He gave His only son. And who ever believes. They shall have enternal life."

(*Faa-Samoa: Ioane 3:16*)

PESE: Iona i le manava o le i'a.

A'OA'OGA:

1. E agalelei Iesu i taimi uma.
2. I totonu o puapuaga o lo o i ai le Alii.

.....

ASO SA: **14 ME 2023 (Aso Sa Tinā)**

MATAUPU: **SENA E, FAAUTA O LAU TAMA**

SINI: Ia malamalamā le vasega i le taua o le alofa o le tinā.

TUSI FAITAU: Ioane 19: 25 – 27

FESOASOANI MO FAIAOGA:

O le mataupu o le Aso Sa lenei, o lo o faatatau i le fetalaga a le Alii na ia fetalai ai ia Maria, ina ua faasatauroina le Alii. O le Aso Sa lenei o le aso ua faapitoa mo tinā. O le uiga o le upu – “tinā,” O le na te puipui ma tausi i lana fanau.” Ae mafai foi ona faauiga i le “alofa”.

O le fetalaga lenei a le Alii, o lo o aumai ai le taua tele o le sootaga faatinā i lana fanau. E leai lava se tinā e manao ina ia ola faalolo pe le mautonu sana fanau i le lumana. I le amataga lava o le tala ia Iesu i lona fanau mai ma oo ina faasatauroina, sa mulimuli lava Maria i le Alii, e oo lava i le taimi na maliu ai. E lei faigofie ia Maria le vaai atu i puapuaga ma faigata na oo ai le Alii. O Maria lea e fetalai ai Iesu, o lona tinā. E lei galo i le Alii lona tinā. Le tinā sa fanaua o ia, sa tausi ma puipui o ia i lona alofa. A oo ina puapuagatia ma oo tiga i le fanau, e lagona e le tinā le mafatia ma le lē mautonu.

Tamaiti, o le alofa o le tinā, e le sola, e le lafi pe uma foi. O le alofa e oo lava i le oti. E le faapea ua tagi Maria ona ua le lelei lana tausiga i lana fanau. Ae ua tagi i le vaai atu i le matuitui ma le matautia o tiga ua oo ia Iesu. E tagi ona o le alofa. E manao foi Iesu ina ia alolofa outou tamaiti ia tinā.

“Faauta o lou tinā.” O le so’o lea na fetalai ai le Alii, o lo o faapea ‘o le so’o ua alofaina’ e Iesu. Ae mafai foi ona faapea o le uso o Iesu. Tele ia o feau ma galuega e feagai ma tinā. Ia fesoasoani le fanau ia tinā. E i ai foi taimi e faanoanoa ai tinā ona o lo outou le usitai. A oo ina mafatia ma faanoanoa tinā, ia outou faamafanafana e ala i le faalogo ma usitai lelei.

E ui ina tiga Maria ona o le alofa i lana tama, ae sili ai ona tiga le Atua ona o le agasala a le tagata. O le mafuaaga lea na maliu ai le Alii, ina ia faamagaloina le lalolagi agasala.

GALUEGA FAATINO:

“Faatino muamua le tala e faiaoga, ona faatino lea e le fanau.”

PESE: Tinā, tinā lelei....

Tinā tinā lelei, e vave ona ala
E faataele a’u, ma fai o lavalava
Tapena mea uma nei mole o lo’u manava
Momoli loa a’u i le aoga ua amata.

A’OA’OGA:

1. E moni le alofa o le tinā.
2. E manuia le tamaitiiti e faalogo ma usitai i lona tinā.

.....

ASO SA: **28 ME 2023**

MATAUPU: **O LE MEAALOFA SILI**

SINI: Ia malamalama le vasega i le taua o le alofa ma ona uiga.

TUSI FAITAU: 1 Korinto 13: 1 – 7

FESOASOANI MO FAIAOGA:

O le malaga lona lua a le Apostolo i lana galuega faamisionare mo nuu ese, sa ia afea ai Korinto ma nofo ai mo le tasi ma le afa tausaga. O lona uiga o Paulo sa ia faatuina le lotu Kerisiano i Korinto. A o aumau Paulo i Efeso, na ia maua ai tala e uiga i le Ekalesia i Korinto. Ua amata ona tele faafitali ma le vevesi. O le mafuaaga lea na tusi atu ai le Apostolo i le Ekalesia, sei toe faamanatu le uiga moni o le alofa, e pei ona a’oa’oina ai latou i le alofa o Iesu Keriso.’

“Afai ou te tautala i gagana a tagata atoa ma agelu ae leai se alofa, e le aoga lava.” O le uiga o le manatu a le Apostolo, e leai se aoga e tau ai le tagata i le alofa ae lē mafai ona faatino. E masani ona tupu lea tulaga i le ola. E i ai taimi tatou te vaai atu

ai ua aafia se tasi i se faalavelave, ona faapea lea. “Talofa e,” ae na o le tutu e leai se mea e faia. Ia po o le tele o mea ua tutupu mai i nisi. Ua na o le tapue o ata i telefoni, ae leai se fesoasoani atu.

O le gagana a agelu – O lo o faatatau i le tagata e fiafia e siisii mau mai i le Tusi Paia, e toaga i le lotu, e tatalo e le aunoa, ae le manao e foai atu, pe fesoasoani atu i nisi po o e ua tau mativaina. E ola aiu ma faitala. O uiga ia e iloa ai, e le o se agelu ae o le tiapolo faafoliga.

“Afafai o ia te au ona perofeta ane.”

O le uiga o lea faaupuga a Paulo, e faapea – Afafai o i le tagata le poto ma le atamai na te malamalamā ai i mea o le olaga, o le iloa o faagasolo o mea o le natura, ma le malosi e mafai ai ona ia galue ma le malosi, ae le iloa ona alofa, o le a le aoga o nei mea uma. O le a le aoga o le poto, atamai ma le malosi, ae leai se alofa, e maimau le taimi.

E foliga mai o le mea tonu lea ua tele ina tupu ai le fevaevaea’i ma le vevesi i Korinito, ona ua galo le alofa sa a’oa’oina ai i latou e Paulo. Lea ua toe faamanatu atu ai e le Aposetolo uiga moni o le alofa. O le alofa e onosai, e loto maualalo, e agamalu. Ua toe faamanatu foi e le Aposetolo uiga e iloa ai le tagata e le alofa. E le mimita le alofa, e le faatupu misa le alofa, e le aiu le alofa, e le faitatala le alofa, e le itaita gofie le alofa.

O uiga ia o le alofa, lea na a’oa’o mai ai Keriso mo tatou. Ia tupu pea le alofa i totonu o tatou loto.

GALUEGA FAATINO: FAATUMU AVANOA

Faatumu avanoa i upu nei:

tagata, sumepalo, apamemea, tagata, onosai, losilosi, agamalu, alofa mitamita vale, lavatia

Afafai ou te tautala i gagana a 1_____ atoa ma 2_____, ae leai sou alofa, ua avea au ma 3_____

taalli, po o se 4_____ tagitagi. E 5_____ le alofa, e 6_____, e lē 7_____ le alofa, e lē 8_____ le alofa. O le 9_____ e 10_____ mea uma.

PESE: Alofa o se mea e te faasoa atu.

A’OA’OGA:

1. O Iesu Keriso o le alofa.
2. E ola fiafia le tamaitiiti alofa.
3. O le meaalofa sili o le alofa.

.....

MANATU TAIALA O IUNI: O LE ATUA LE ALA

Fetalai Iesu, “O a’u nei le ala ma le upu moni ma le ola; e le alu atu lava se tasi i le Tamā pe a le ui mai ia te a’u” (Ioane 14:6). E faapena le lagona o lenei masina ua avea ma manatu taiala, ia fai Iesu Keriso ma ala e tatou te mulimuli ai. Auā foi ua na o Ia lava le ala e ui atu ai le tagata, o le faitoto’ā foi lea i le mālō o le Atua e faavavau.

ASO SA: **4 IUNI 2023**

MATAUPU: **O APOAPOA’IGA ALOFA**

SINI: Ia malamalamā le vasega, e eseese auala e a’oa’i ai i tatou le fanau e o tatou matua.

TUSI FAITAU: Tito 2: 11 – 15

FESOASOANI MO LE FAIAOGA:

O le upu apoapoa'i e foliga tutusa ma uiga o upu ia, faufautua, faatonu, a'oa'o po o le a'oa'i foi. I totonu o le tatou aiga, e i ai taimi e tutupu ai faafitauli i le va o tatou le fanau ma o tatou matua. Mo se faata'ita'iga, a fa'alogotatā i tatou ia tamā ma tinā, ona sasa lea o i tatou, e a'oa'i ma faatonu. E mafua ona sasa tatou ona o le naunauta'iga o matua, ia faalogo ma usita'i fanau ma ia ola manuia. O le uiga foi lena o le apoapoa'iga alofa, o le faatonu ma le a'oa'i ina ia popoto ai i tatou le fanau.

O Tito, tasi lea atalii faaleagaga o Paulo sa ia liliuina e fai ma ana ave feau e tala'i le Tala Lelei. O le tusi atu o le apostolo i lona atalii faaleagaga o Tito, o se tusi o lo o apoapoa'i atu ai Paulo e uiga i le lotu. Aemaise o se faamalosiau e uiga i le faatuatua ma aga faa kerisiano, ma ia tautuana perofeta pepelo ma a'oa'oga eseese e mafai ona liliueseina ai mafaufau o tagata. O le feau o lo o momoli i tagata o le nuu o Kereta, aua o i tonu na tuua ai e Paulo Tito e na te vaaia le lotu. Aua o apoapoa'iga alofa e toe fuata'i ai le mafaufau o le tagata, o apoapoa'iga e avea o se fafagu i le tagata ua sesē. Pei lava ona a'oa'o mai Paulo ia Tito, ia manatua le meaalofa foa'ifua a le Atua e ala i lona Alo pele o Iesu Keriso lea na maliu mo le lalolagi agasala.

Fanau e taua apoapoa'iga alofa, afai lea ua apoapoa'i le apostolo ia Tito e uiga i le lotu ma amioga e tatau mo le tagata kerisiano. E faapena foi le uiga o lenei olaga. E eseese auala e a'oa'i ai i tatou e matua i totonu o lo tatou aiga. O nisi e a'oa'i e faatonu i upu ma tala. O nisi fo'i o i tatou e sasa, ina ia iloa e i tatou lo tatou sesē ma ia manuia i tatou le fanau i fautuaga a tatou matua. A o nei mau apoapoa'iga e faavae uma i le alofa. O apoapoa'iga alofa e ala i le faaaloalo, toaga i le lotu, ma toaga e tatalo. O a'oa'oga alofa ia e limata'ita'iina ai le fanau. Ia maua e i tatou le lototetele ma le mataala, ma ia savavali i tulafono ma poloa'iga ua a'oa'oina ai i tatou.

O le uiga lena o le mataupu mo i tatou le fanau, afai lea ua apoapoa'i Paulo ia Tito, e faapena foi se apoapoa'i mai a o tatou

matua ia i tatou e tusa o a tatou amioga. Ma ia o tatou faia pea lona finagalo, ma manatua pea lona alofa mo i tatou e faavavau.

Uiga o Upu:

- | | | | |
|------|--------------|---|------------------------|
| i) | faalematau | - | amioleaga / le usita'i |
| ii) | faautauta | - | faapalepale, onosa'i |
| iii) | togiola | - | togisala |
| iv) | solutulafono | - | agasala |
| v) | maelegā | - | naunauta'iga |

GALUEGA FAATINO: Fa'afetaui Upu (*Matching*)

- | | | | |
|----|-------------|---|---------------------------------------|
| 1. | Apoapoa'i | → | fautua, faamalosi au |
| 2. | Alofa tunoa | - | itagia |
| 3. | Faaolataga | - | mata'utia, ofoofogia |
| 4. | Faalematau | - | mana'o faalelalolagi |
| 5. | Tu'inanau | - | faapalepale |
| 6. | Amiontonu | - | alofa o le Atua |
| 7. | Mamalu | - | faaolaina, togolaina |
| 8. | Inosia | - | amio faapaupau |
| 9. | Faautauta | - | amio sa'o, ato'atoa i luma o le Atua. |

PESE: Le Alofa o le Atua pei o se li'o tele

Le alofa o le Atua pei o se li'o tele
 E ta'amilo lava leai se mutaaga
 E alofa mai o Ia, fai pea e le gata
 Ua alofa mai o Ia, i aso uma lava

God's love is like a circle
 A circle big and round

And when I see the circle no ending can be found
But when the love of Jesus goes round eternally
Forever and forever I know that God loves me

A'OA'OGA:

1. Talitonu ma faatuatua i le Atua
 2. Faamoemoe i le Agaga o le Alii e manuia ai le taumafai
 3. E taua apoapoa'iga mai i ou matua
-

ASO SA: 11 IUNI 2023

MATAUPU: UA TOFIA IOSUA E FAI MA TA'ITA'I O ISARAELO

SINI: Ia malamalama le vasega, i le taua o le avea o oe le tama ma le teine A'oga Aso Sa e fai ma ta'ita'i

TUSI FAITAU: Iosua 1: 1 – 9

FESOASOANI MO LE FAIAOGA:

E i ai le fa'aupuga faa Samoa e faapea, e soso'o le fau ma le fau. O lona fa'amatalaina i se uiga faa faigofie, o se tagata sa avea ma ta'ita'i lelei i totonu o se faalapotopotoga ae ua maliu. E i ai la le naunauta'iga o lena faalapotopotoga, e manana'o e saili se isi a latou ta'ita'i, ona faapea lea o le faaupuga, e tatau lava ona soso'o le fau ma le fau. E tatau ona i ai se isi ta'ita'i lelei e fa'auauina le galuega.

E fa'apena foi le lagona o le tatou mataupu i lenei taeao, i le tofia ai o Iosua e fai ma ta'ita'i o Israelu. E tatau lava ona soso'o le fau ma le fau. I le molimau i le tala ua fa'amatalaina, o lea ua

maliu Mose le ta'ita'i logologoā o Israelu, ae ua soloa'i mai Iosua le atalii o Nuno e fai ma ta'ita'i. E le i faigofie le tula'i mai o Iosua e fai ma ta'ita'i, auā fo'i o lea ua sauni le nu'u e ulufale i le nu'u na folafolaina. Peita'i o lea lava ua toe faamalosiau le Atua ia Iosua, ina ia lototele ma tumau i le Atua.

Afai o mea uma lava na folafola e le Atua ia Mose, e faapena foi le tula'i mai o Iosua e fai ma ta'ita'i ia Israelu. Fai mai le fuaiupu e 5, "E le tu mai se tagata e tetee ia te oe i aso uma o lou ola; e pei ona ou i ai ia Mose, e faapea ona ou i ai ia te oe; ou te le tuua lava oe, ou te le tu'ulafoa'i ia te oe". O le molimau ola lea i galuega lelei sa faia e Mose mai lava i le taimi na valaauna ai o ia e fai ma ta'ita'i. O lea foi ua tofia e le Atua Iosua e fai ma ta'ita'i, o lo o faaaauau pea le feagaiga e pei ona molimauna.

Afai o se taitaiga lelei sa faia e isi ta'ita'i o le nu'u sa i ai muamua, e fa'apena foi le lagona o le mataupu i lenei taeao. O le valaauna o Iosua e fai ma ta'ita'i, o tofiga lava mai i le Atua. E le itiiti le tofiga ua tofia ai Iosua, e le gata o ia e na te faaulufaleina Israelu i Kanana, ae faapea foi lona vaevaeina o fanua ma lauelele mo Israelu. Lea e fai mai le fuaiupu e 6 "Ia e faamalosi ma loto tele; aua e te tofia mo lenei nuu le lauelele na ou tauto ai i o latou tama e foai atu ia te i latou"

O le avea o Iosua e fai ma taitai ia Israelu, o se fuafuaga ua leva ona tapena e le Atua. O le ala lea o le faamalosi ma le faa lototele pea e le Atua ia Iosua, ina ia 'aua, 'aua lava nei faavaivai. Aua o le mea moni lava, o le avea ma taitai e le o se mea e faigofie. E lagona le fefe ma le popole, e i ai taimi e sau ai le faavaivai ma le fiu. Peita'i o le fesoasoani mai o le Atua, e faalototeleina ai le tagata vaivai ma le faatauvaa.


Le fanau e, e i ai taimi e tofia ai oe e fai ma taitai i totonu o lou aiga, o le aoga, ma totonu foi o le lotu. E lagona lou popole ma lou fefevale, e te le mautonu foi i au faaiuga e fai, peita'i o le faamoemoe pea i le Agaga o le Alii e manuia ai lou taumafai. Tatou te faamoemoe pea i le Atua, auā e fesoasoani mai o Ia pe a o tatou saili fesoasoani atu foi ia te Ia. O le avea foi e fai ma ta'ita'i, ia o tatou lagona lo tatou loto maulalo ma le fa'atauvaa'e e fa'atinoina ai lo tatou valaauna.

Uiga o Upu:

- i) sopoia – sopoloa po o le savali mai le isi itu vai i le isi itu fefe, palaai
- ii) mata'u –

GALUEGA FAATINO:

Tapena e lau susuga i le faiaoga ni pepa A4 e tufa i le vasega ona fa'ata'ita'i ai lea o le faatinoga e pei ona avatu i lalo. O le faiga o le galuega, lisi mai i lalo ni aga po o ni amioga a se tagata ua filifilia e fai ma ta'ita'i.



PESE: Le Alofa o le Atua e ofoofogia

A'OA'OGA

1. E faigata le avea ma ta'ita'i, ae faigofie mea uma i le auai mai o le Atua
 2. Fa'amoemoe i le Atua e manuia ai mea uma
 3. O Iesu le ta'ita'i sili
-

ASO SA:

18 IUNI 2023

MATAUPU:

UI ATU I LE FAITOTO'A

SINI:

Ia malamalama le vasega, i le taua o le faitoto'a

TUSI FAITAU: Ioane 10: 1 – 6

FESOASOANI MO LE FAIAOGA:

O le faitoto'a lava ia, e ulufale ai le tagata i totonu o le fale. E fa'aaogaina o le ulufale ma le ulufafo i so o se taimi. Ma e eseese foi ituaiga faitoto'a ae 'auga lava e tasi i le faamoemoe, e te ulu ai i totonu ma fafo. Pei lava foi o le faitoto'a o le pa mamoe lea e talanoa ai le fai evagelia, e ulu atu ai le leoleo mamoe e asi lana lafu mamoe. O lona uiga e le itiiti le taua o le faitoto'a i le pa mamoe.

Molimau le Tusi Paia “.....o le le ui atu i le faitotoa i totonu o le lotoa mamoe, a e alu ae i ai i se tasi mea, o le gaoi lea ma le faomea”. O le mataupu lea na faitauina, o le faataoto o lo o faatusaina ai e Ioane Iesu o Ia o le leoleo mamoe. Lea lava o lo o molimau le Tusi e uiga i le ui atu i le faitoto'a, e ese le taua i le faatinoina lea o le tiute o le leoleo mamoe pe a fua atu i le natura o lea foi galuega.

Auā o le ui atu i le faitotoa o le leoleo mamoe lea, aua ua na o ia e masani ai. E faapena foi ona masani ai mamoe i le leo o le leoleo mamoe aua foi e ui atu i le faitotoa e vaai le saogalemu o ana mamoe. A o le faataoto lea o lo o matuā manino ai lava Iesu o Ia lava o le leoleo mamoe lelei, e muamua ma mulimuli atu i tua o ana mamoe e faalologo i ai ana mamoe e le usita'i lava i se isi tagata ese. Ae tasi lenei faataoto o lo o tali atu ai Iesu i le au faresaio ma ta'ita'i o le lotu Iutaia e uiga i lana galuega na afio mai ai i le lalolagi.

O Ia o le leoleo mamoe e faalologo uma ai mamoe. E usita'i ai mamoe i lona leo pe a valaau. Ua na o Iesu Keriso foi e ui atu i le

faitotoa ma valaa lana lafu mamoe e mulimuli atu ia te ia. E le mafai lava e se tasi tagata ona ia ulufale atu ai sei vagana lava le ta'ita'i o ia e ana le lafu mamoe. Le ala lea o le molimau a Ioane o le ui atu i le faitotoa o le leoleo mamoe ia, a o le le ui atu i le faitotoa o le gaoi lea ma le faomea.

Fai mai le tala ina ua uma ona faamatala lenei faataoto, e le i lagonaina e le au faresaio le uiga loloto ma le moni. E faapena le afio mai o Iesu Keriso i lenei lalolagi, aemaise lona mālō e faavavau. O Ia lava o le leoleo mamoe sili, e ui atu i le faitotoa e tauvalaau i ana mamoe. O lo o faatusa i le galuega tala'i na Ia afio mai ai e saili i ana mamoe. E tau valaa ma faaola mai nei satia e ni tagata leaga ma le faomea.

Le fanau e, e taua le ui atu i le faitoto'a. O le molimau a Ioane o le le ui atu i le faitoto'a o le gaoi ia ma le faomea. I se isi vaaiga e uiga i le faitoto'a, e le mafai ona e iloa atu le matagofie o i totonu, ia po o tua atu pe a e le ui mai i le faitoto'a. O lona uiga e taua le ui mai i le faitoto'a, o le ala lena e maua ai se mea lelei. Ae le o le faamalama o se fale, po o autafa o le pa mamoe aua lea e manino lava le molimau a Ioane aua o le gaoi ia ma le faomea.

Uiga o Upu:

- i) fao mea - gaoi
- ii) lotoa - o le nofoaga e nonofo ai mamoe
- iii) puipui - o le faitoto'a o le pa
- iv) faataoto - tala faa faatusa

GALUEGA FAATINO: Tusigā Solo

Tusi mai sau solo (lua fuaiupu, fa laina) e faatatau i le faitoto'a i lona taua ma sona aoga. Ma faamatala mai se taua o lo o aumai i totonu o le Tusi Faitau e iloa ai ua e malamalama atili i le mataupu.

1. E tele le taua o le faitoto'a i so o se nofoaga
Aua e ulufale ai ma ulufafo ai i taimi uma lava

E te ui i le faitoto'a e pei ona molimau ai Ioane
Ae le o se isi mea, o lona uiga o le gaoi ma le faatupu
faalavelave

2. Tatala mai ia le puipui ae se'i ulufale le leoleo mamoe
A o atoa ma le po o galue, e le tulemo
Afaei ae satia lana lafu e ni manu feai
E matua'i saili lava ia maua, pu'e mai ae saisai

PESE: Ui atu i le faitoto'a (fati: *Have you ever seen the rain by Creedence Clearwater Revival*)

Ui atu i le faitoto'a
Leoleo mamoe ua ulufale i totonu
O mamoe, e faalologo i lona leo
Iesu o le ta'ita'i sili
Ulufale i le fiafia o le Ali'i
E faavavau lava lona alofa

Tali: To mai ia te a'u
Le faitoto'a o le amiotonu
Faaavanoa nei loa, o lou loto mo Iesu
Ona maua ai lea o le filemu

A'OA'OGA:

1. Savali i ala o le manuia ae le o le malaia
 2. O Iesu le faitoto'a i le ala i le ola e faavavau
 3. Ui i le faitoto'a ae le o le faamalama
-

ASO SA: **25 IUNI 2023**

MATAUPU: **O LE MALAIA O ETOMA**

SINI: Ia malamalama le vasega, e leaga le taui ma sui.

TUSI FAITAU: Opetaia 1: 9 – 15

FESOASOANI MO LE FAIAOGA:

O se faamanatu mo i tatou le fanau i lenei taeao, o ai foi Etoma? O Etoma e pei ona taua i le tala, o le nuu e tupuga mai ia Esau le ulumatua a Isaako o le uso o Iakopo.

Ina ua faatafea le nuu o le Atua e le mālō tele o Papelonia na matua'i iloga lava ona olopalaina i latou. O le mea moni lava ia i le Talafaasolopito o le nuu o le Atua, fai mai na matua'i ataata ma fiafia Etoma uma i le faasalaga o Iuta. A o le isi lea nuu na fesoasoani tele ia Nepukanesa i le tapu'eina o tagata o Iuta ma momoli i totonus o Papelonia. E le gata i lea a ua o latou ave faagaoi meatotino a le nuu. Fai mai le fuaiupu e 13 “Ua le tatau ina ua e ulu atu i le faitotoa o lo'u nuu i le aso o lo latou malaia; ua le tatau ina ua e maimoa, o oe lava, i lo latou tiga i le aso o lo latou malaia; ua le tatau foi ina ua e tago i o latou oloa i le aso o lo latou malaia”.

O lona uiga na matua'i usi lelei le silasila ma le maimoa a Etoma ae alo Papelonia i a latou faafiafiaga ia Iuta e ala i le faatafunaina. E foliga o lo o atagia mai i le taui ma sui o Etoma ia Iuta. Ua le ofo le fesoasoani ae tu'u pea Papelonia e faatino la latou faasalaga. O le ala lea o le o'o mai o le faaaliga ia Opetaia e ave ia Etoma ma le malaia o le a o'o ai pei ona i ai le fuaiupu e 10 “E matua faamaina oe ona o lou sauia i lou uso o Iakopo; e faaumatiq foi oe faavavau”. Afai sa agaleaga Etoma ia Iuta uma, e faapena ona toe taui atu e le Atua.

O se fesili e faatupu manatu pea....aisea lava ua agaleaga ai Etoma ia Iuta? E mafai ona faapea, e toe fo'i lava le Talafaasolopito i le amataga i le taimi o le tupuaga o malo nei e lua, o Esau ma Iakopo. Ma e i ai le talitonuga o le afuaga lea o le ita, ita umi pea o tagata o Etoma ia Iuta, ona o lo latou taofi, o i

latou o le ulumatua e pale i faamanuiaga. O lea la ua tupu le faafitauli ia Iuta, a o lea ua nofonofa ma matamata.

O le uiga o le tala, e le lelei le taui ma sui i le uso moni. Afai e fai mai le tala “E ‘aua ne’i goto le la o e ita pea” ae se'i vaai la ia Etoma o e na tupuga mai ia Esau, lea lava e tauave mai lava lea mafuaaga, ua avea pei o se luma i lo latou ituaiga. O le ala lea o le ita umi pea ia Iuta. Ae le o le finagalo lea o le Atua i le tagata, finagalo le Atua ina ia nonofa fealofani lana fanau uma. Manatu foi o le ala lea o le tupu o le to'asa o le Atua ia Etoma, ua leai se loto faamagalo, ua leai se alofa moni i le uso o le toto ma le aano. Ae ua nofonofa ma matamata i le sauniga a Papelonia na faia ia Iuta.

Ia tatou lagonaina lo tatou faatauvaa, le fanau e, i lenei taeao. E leaga le taui ma sui, aua e faasalaina ai oe e le Atua. Aua a agaleaga mai, ia alofa atu i ai; e pei ona a'oa'o mai ai lo tatou Alii Faaola o Iesu ia i tatou. Silasila foi ia Etoma ma le malaia o le a o'o i ai, a lea na valoia e le perofeta o Opetaia. Fai mai le fuaiupu e 15 “Aua e latalata le aso o le Alii i nuu uma; e faia ia te oe e pei ona e faia; e toe iu atu ia te oe mea na e faia”. O le malaia lea o Etoma e pei ona molimau ai le perofeta, e toe iu atu ia te oe mea na e faia. O lona uiga afai sa matua'i olopalaina Iuta e Papelonia e faapena foi le tulaga o le a o'o i ai Etoma. O le taui lena i le tagata e ola taui ma sui ma lē alofa, e o'o mai ai le faamasinoga a le Atua.

Upu ma Uiga:

- | | | | |
|------|-----------------|---|---|
| i) | Timanu | – | o le igoa e faatatau ia Etoma. O lona uiga o le itu i Matu (<i>South</i>) |
| ii) | fa'amāina | – | ulagia |
| iii) | fa'atagataotaua | – | ave faapologa i lalo o se isi ta'ita'iga |
| iv) | fa'atu'umana | – | fiafia (rejoice) |
| v) | faasiasia | – | faanoanoa |
| vi) | malaia | – | oti, tafieseaa, faaumatiq |

vii) mafegāala — magaala (*crossroads*)

GALUEGA FAATINO:

Fa'amatala uiga o upu ma fuaiupu o lo'o i le tala

1. (fuaiupu 9) Timanu e,

Tali: O lo o faatatau le upu Timanu ia Esau ia po o Etoma foi aua o lo latou tupuaga lea. O le upu Timanu o lona uiga o le Southland, ia po o le itu i Saute o le nofoaga sa nonofo ai tagata o Etoma

2. (fuaiupu 10) E matua fa'amāina oe ona o lou sauia i lou uso o Iakopo; e faaumatiq foi oe e faavavaau

Tali: O lo o faatatau i le faamasinoga a le Atua ia Etoma. O Iakopo o lo o faatusa ia Iuta o le uso Etoma ia po o Esau.

3. (fuaiupu e 13) "Ua le tatau ina ua e ulu atu i le faitotoa o lo'u nuu i le aso o lo latou malaia; ua le tatau ina ua e maimoa, o oe lava, i lo latou tiga i le aso o lo latou malaia; ua le tatau foi ina ua e tago i o latou oloa i le aso o lo latou malaia".

Tali: O lo o faatatau ia Etoma i le taimi na o latou maimoa ma matamata ai i le faasalaina e Papelonia o Iuta. O lo o faamatalaina ai foi le ave faagaoi ai e tagata o Etoma o oloa o le nuu o le Atua

PESE: Tulei ese, tulei ese avega mamafa uma o lo'u Agaga

A'OA'OGA:

1. E le fiafia le Atua i le tagata ae ola aamu
 2. Ia maua le loto faamagalo
 3. 'Aua le taui ma sui
-

MANATU TA'IALA O IULAI: I TOTONU O FAIGATĀ O LOO I AI LE ATUA

E faapefea ona o tatou iloa le Atua i totonu o faigatā o le ola? O lo o i le tagata lava ia lana tali. Ae i le manatu o lenei masina, o lo o i lo tatou ola ma le faasaoina mai i le tele o faigatā. O le feau mo i tatou ina ia o tatou saga viia ma faafetaia le Atua i lea alofa mo oe ma a'u.

ASO SA: **2 IULAI 2023**

MATAUPU: **OLA VIVII I LE ATUA**

SINI: Ia malamalama le vasega i le taua o le vivii ma tatalo i le Alii i taeao uma e ala mai ai.

TUSI FAITAU: Salamo 108: 1 – 4

FESOOASOANI MO FAIAOGA:

O le Salamo o le tatala a Tavita i le Atua ona o le alofa le mavae ma le faamaoni o le Atua. "Aua ua maualuga lou alofa i le lagi, o lou faamaoni foi ua oo i ao." O se tasi lenei o uiga masani o Tavita, o le ola vivii ma tatalo i le Atua. Ae sala foi ma le galo ia Tavita lona Atua, pe a fua i mea na tutupu i lona ola, mai lava i tamaitiiti seia avea ma tagata matua.

O faagasologa uma o mea e tutupu i le ola ua leva ona silafia e le Atua. O taimi, aso ma tausaga o le tamaitiiti ua uma foi ona faatulaga e le Atua. E fnau mai le tamaitiiti ua i aao o le Atua lona ola. E oo lava i laasaga fesuisuiai o lona olaga e leoleo ma puipui e le Alii. O mea foi e tutupu mai i le natura o le foafoaga, e lotolotoi ai lava le Agaga o le Atua. O le mea lea e tupu ai pea le loto vivii o Tavita i le Atua. O galuega e fai e outou tamaiti, o lo o outou galulue faatasi lava ma le Atua e ala i lona Agaga Paia. E oo foi pe a momoe ma malolo i le po, e leoleoina ma tausi pea outou e le Atua.

O le oso ae o le la o le aso fou, o le faailoga o le ola mai le malosi faafouina, e tupu ai le faamoemoe fou. Aua nei galo ona vivii ma tatalo i le Atua ina ua alafai mai i lona alofa.

Tamaiti, o le vaitau lenei o lo outou ola e feagai ai pea outou ma le sailiga o le poto. Afai e ala le tamaitiiti i le taeao, ia muamua ona vivii ma faafetai i le Atua, ona o le ola ma le malosi faafouina ua e maua, ona e alu fiafia ai lea i le aoga. O le upu a le poto, o Solomona, “O le mata’u i le Atua o le amataga lea o le poto.”

Uiga o Upu:

- i) Tavita - alofaina
- ii) lotolotoi - auai, faatasi mai
- iii) laasaga - taimi
- iv) Salamo - pese/tatalo
- v) mata’u - ava/fa’aloalo

Faaupuga Uiga

- i) “*Ua mau lou nei loto*” - ua fiafia le loto
- ii) “*Ou te vivii ia te oe i luma o le nuu*” - Ia vivii ma tatalo i le Atua tusa lava pe tumu tagata.
- iii) “*Ua sili lou alofa i le maualuga i le lagi*” - E le uma le alofa o le Atua.

GALUEGA FAATINO: Fatu se Pese

Fatu mai sau pese e faatatau i le Ola vivii i le Atua, tasi pe lua fuaiupu.

PESE: O le Alofa o le Atua pei o se li’o tele

A’OA’OGA:

1. Toaga e tatalo i taeao uma.

2. Aua le fefe e tatalo.
3. Fiafia e pese ma vivii i le Atua.

.....

ASO SA:

9 IULAI 2023

MATAUPU:

O MA’A FAAMANATU

SINI:

Ia malamalama le vasega i le mafuaaga na finagalo ai le Atua e aumai ni ma’a e fai ma faamanatu i le nuu o Israaelu ina ua sopoia le Ioritana.

TUSI FAITAU: Iosua 4: 1 – 7

FESOASOANI MO FAIAOGA:

Ina ua maliu Mose, ona tofia ai lea e le Atua Iosua e taitai Israaelu i le nuu folafolaina, po o Kanana. Ua maea ona sopoia e le nuu le vaitafe o Ioritana, ona faatonu lea e le Atua o Iosua ina ia filifili mai ni tagata e toa seulu ma le lua, e aumai ni maa e sefulu ma le lua mai le ogatotonu o le vaitafe, ina ia fai ma ma’a faamanatu. E fua lava ma’a i ituaiga e sefulu ma le lua o Israaelu. A o ma’a e faamanatu ai le taimi na sopoia ai e Israaelu le vaitafe o le Ioritana. E le na o le sami ulaula na vaeluaina e le atua lea na sopoia e Israaelu ina ua tuliloa mai i latou e Aikupito e fasioti. E oo foi i le vaitafe o le Ioritana, na vaeluaina foi e le Atua mo lona nuu, ina ia aua nei taofia ai le faigamalaga i le nuu folafolaina.

Sa usitai Iosua i le Atua, ma ia tofia ai tagata mai ituaiga e 12 o Israaelu, e o e amo mai ma’a. O ma’a e faamanatu ai pea le alofa ma le agalelei o le Atua i lona nuu. Ae o le faamanatu foi i le nuu, o le Atua lea latou te malaga faatasi, o le Atua malosi na te mafaia mea uma.

O le lautele o le vaitafe o le Ioritana, e 400 – 3,000 mita, a o lona loloto e 15-60 mita. E malosi le tatafe o le vaitafe. A fua i ai lona lautele, loloto ma le malosi o lona tatafe, e le faigofie ona sopoia e le nuu. A o lea lava sa mafai ona o le mana o le Atua. A o le faailoga foi lea, e le mafai ona tuulafoai e le Atua lona nuu.

O le uiga la o nei ma'a, e pei o le mataupu o lenei Aso Sa, o ma'a faamanatu, e toe manatua ai e Isaraelu i le lumanai, vavega silisili ese na faia e le Atua mo i latou, a o feagai ai ma faigata o le faigamalaga i le nuu folafolaina.

Tamaiti, e ese le tele o mea e faamanatu mai ai ia te i tatou le Alofa o le Atua. A o le faamanatu sili mo outou, o le alofa o matua.

GALUEGA FAATINO: FAATINOGA

Faatino le tala e le vasega

PESE: (fati: Laumei faiaga)

Isaraelu! Omaia! (x2)
Omaia i Ioritana, se'i fili atu o ni maa
E fai ma faamanatu i o tatou olaga
O le alofa o le Atua, le mafuaaga
Ua tatou sopoia, o le Ioritana.

A'OA'OGA:

1. Ia manatua pea le Alofa o le Atua.
2. E faailoa mai pea le Alofa o le Atua i aso uma.

.....

ASO SA: 16 IULAI 2023

MATAUPU: UA ALOFA PAULO IA ONESEMOM

SINI:

Ia malamalama le fanau i le mafuaaga na alofa ai Paulo ia Onesemo.

TUSI FAITAU: Filemoni 1: 8 – 16

FESOOASOANI MO FAIAOGA:

O Filemoni, o se tasi lea o uo a le Aposetolo o Paulo, lea sa nofo ai le tama o Onesemo. Sa fai Onesemo ma pologa a Filemoni. O le pologa, o le tagata lea e faia feau a se aiga mauoa ae leai se totogi. E i ai le mea na tupu ia Onesmo, ua le usitai o ia i lona matai o Filemoni, ona fefe ai lea ma sola ese mai lona matai. O le mafuaaga lea na tusi atu ai Paulo ia Filemoni e uiga ia Onesemo.

O le tusi lenei o Filemoni sa tusia a o i ai Paulo i le falepuipui. O i i le falepuipui sa fetaui ai Paulo ma Onesemo. Sa avea le feiloaiga a le Aposetolo ma Onesemo, ma mafuaaga na faa-Kerisiano ai le atalii. Sa aoao e Paulo Onesemo i mea uma e uiga i le Tala Lelei ia Iesu Keriso. Ae le gata i lea, ua avea foi Onesemo ma atalii ia Paulo, e faia feau a le Aposetolo ao i ai i le falepuipui. Ua usitai Onesemo ua fiafia e faalogo i a'oa'oga a Paulo. O le mafuaaga lea ua tupu tele ai le alofa o Paulo ia Onesemo ma ua manatu ai le Aposetolo ia toe faafoi atu o ia i lona matai o Filemoni.

O le tusi atu ai o Paulo ia Filemoni, e faailoa ai le suiga o le olaga o Onesemo. Ua avea ma tama lelei, ua usitai. A o le mea sili ona taua ia Paulo, ua avea Onesemo tagata ua fanaufouina ia Keriso. Po o ua ola foi ia Keriso. O mea uma ia ua faailoa e Paulo i lana tusi lenei ia Filemoni.

Ua talosaga foi le Aposetolo, ia aua nei toe avea ma pologa pe a toe foi atu, ae ia avea Onesemo ma uso ia Keriso.

Tamaiti, o le fiafia o le tama o Onesemo i le aoaiga e ala ia Iesu Keriso, na alofa ai Paulo ia te ia, ma manao ai ina ia faasaoloto mai i le ola pologa. E le o taua i le tala pe na toe talia e Filemoni

ia Onesemo, ae mautinoa lava na talia, aua o Filemoni o le tagata ua ia talia foi le Tala Lelei ia Iesu Keriso.

Uiga o Igoa:

Ia a'oa'oina le fanau i uiga o igoa o tagata nei

	<u>Igoa</u>	<u>Uiga</u>
i)	Paulo	Loto maualalo (humble)
ii)	Filemoni	Mafaufau Alofa (Love Thought)
iii)	Onesemo	Aoga (useful)

GALUEGA FAATINO: Fesili ma Tali.

1. O ai Filemoni?

Tali: O le uo a Paulo

2. Aisea na sola ese mai ai Onesemo ia Filemoni?

Tali: Fefe ina ua le usitai

3. O le a le uiga o le upu pologa?

Tali: Auauna e leai se totogi

4. O fea sa tusi ai e Paulo le tusi o Filemoni?

Tali: Falepuipui

5. Na tali e Onesemo aoaiga a Paulo?

Tali: Ioe (ua avea ma Kerisiano)

PESE: E alofa Iesu ia i tatou uma.

A'OA'OGA:

1. Ia faalogo ma usitai i le aoaiga a matua.

2. O le Ola ia Keriso e maua ai le fiafia moni.

ASO SA:

23 IULAI 2023

MATAUPU:

FAATUATUA I TOTONU O FAIGATA

SINI:

Ia malamalama le vasega i le taua o le faatuatua i taimi faigata.

TUSI FAITAU:

Roma 5: 1 – 5

FESOASOANI MO FAIAOGA:

E manatu ua masani le faalogo a le fanau i le upu faatuatua. Ae i ai le talitonuga e le o atoatoa ona malamalama ai le fanau i lenei uiga. O le uiga o le upu ‘faatuatua,’ o le talitonu ma le loto atoatoa, ia ‘Iesu Keriso.’ Aua o Iesu Keriso o le Faaola. O se faataitaiga faigofie, o matua ma fanau. E le mafai ona aveese mai loto o fanau i matua, ona latou te talitonu o matua e puiupui ma tausi ia te i latou i taimi uma. Aemaise taimi o feagai ai ma faigata ma tiga.

Ina ua pulea e le malo o Roma Israuelu, sa tele puapuaga sa oo i le au Kerisiano. E fai o le sasa ma tiga e oo i le tino, ae ua leiloa foi po o fea e maua ai se fesoasoani.

E oo lava i le ola faa-Kerisiano ua amata ona vaivai. A o nei sauaga uma e lei vaivai ai le Apostolo o Paulo. Lea ua tusi faamalosiau atu Paulo i e ua sauaina ona o Keriso, ia tumau i le faatuatua. E le faapea ua sauaina ona o se amio ua le lelei, ae ua mafua ona o tagata le talitonu ua le fiafia ia Iesu Keriso.

O se tala faataitai lenei i se tama sa tumau lona faatuatua i le Alii e oo i le oti. Sa i ai se tama e igoa ia Polikapo, e 83 ona tausaga. Ua taitaiina atu le toeaina o le a fasioti ona ua le mafai e fitafita Roma ona aveese le loto o Polikapo mai le Alii. Ua mananao e upu leaga ma faafiti e le toeaina Iesu Keriso. Ae fai mai le tala a Polikalo –

“E 83 tausaga sa ou auauna ai i lou Alii, e leai se mea leaga ua ia falaia ia te au, e le mafai i lenei taimi puupuu o le a fasioti ai au, ona ou faafiti i lou Alii.”

O le uiga moni lea o le faatuatua e pei ona tusi faamalosiau atu ai Paulo i Kerisiano i Roma. Aua le vaai atu loa i faigata ma tiga vave loa ona galo Ieus. Ia avea tiga ma faigata e atili ai ona malosi le faatuatua. O le faatuatua i totonu o puapuaga e tupu ai le onosai, o le faamoemoe ma le mautinoa, o Iesu tatou manumalo ai.

GALUEGA FAATINO: Faatino le Tala ia Polikapo

Amataga o le Tala - Taitai atu Polikapo e fasioti, toalua fitafita Polikapo – savali mai uu le Tusi Paia.

Fitafita 1 Se toeaina, tiai i ai lena Tusi Paia, ma tau ia Iesu ua e le fiafia ia te ia.

Fitafita 2 Ou te ofo i lou le fefe i leona la e faatali mai mo oe.

Polikapo Le le mafai ona ou faia se mea leaga i lou Alii.

Fitafita 1 O le a lava le mea e te talitonu umi ai ia Iesu, e leai se Iesu o iinei, ua leva ona oti.

Polikapo vaai oulua, ua 83 tausaga o ou auauna ia Iesu Keriso, e ui ina oti o Ia, ae o lo o tumau pea lona alofa mo au.”

Polikapo Toatuli ma usu le pese – “E le alofa o Iesu.”

A’OA’OGA:

1. Ia malosi le faatuatua i taimi o puapuaga.
2. E le galo oe i le Alii.

ASO SA:

30 IULAI 2023

MATAUPU:

SINI:

O HEROTIA LE MASIOFO LEAGA

Ia malamalama le vasega i le tinā e igoa i a Herotia, ma le leaga o lana mea na fai.

TUSI FAITAU: Mareko 6:14-29

FESOASOANI MO FAIAOGA:

O Herotia, o le āva po o le to’alua o Filipo. O Filipo o le uso o Herota, a’o Herota, sa fai ma tupu o Iutaia. Sa mana’o Herotia e nonofo ma le uso o lona to’alua [Herota]. Peitai, sa fa’ailoa i ai e Ioane, e lē se mea sa’o le toe nonofo o i la’ua, ona o Herotia, o le avā a Filipo le uso o Herota. O le ala lea na saili ai e Herotia se auala e fa’ao’o ai le oti iā Ioane. O lo o fa’aalia ai lona loto naunau ina ia nonofo ma Herota. Le ala lea, o lona fa’aaogaina o si ana tama teine, e fai ma auala e na te maua ai Ioane le papatiso. O le tapenaga o le aso fanau o Herota le tupu, na ulufale ai le tama teine a Herotia ma sa’asa’ a i luma o le tupu, ma le ‘au vala’aulia o le aso fanau. Na fesili le tupu i le teine, pe i ai se mea e mana’o ai, na te faia mo ia, so o se mea lava e o’o i le vaeluaina o le malō, e faia lava e le tupu mo le teine.

Ona alu lea o le teine i tua ma fesili iā Herotia lona tinā, po o le ā se mea e mana’o ai e ta’u atu iā Herota le tupu. O le tali a Herotia, fai atu i le tupu e te mana’o i le ulu o Ioane le papatiso i totonu o se tanoa.

E ui ina faigatā iā Herota, ae lē mafai ona ia toe fa’afoi ana upu na fa’ataunu’u ina lava le mana’o leaga o Herotia, ma fasiotia ai Ioane le papatiso.

O Herotia la, e lē o se tagata e lelei lana amio tamaiti. O se tinā e leaga lana mea sa fai, ona ua lē gata ua a’afia ai le ola o Ioane le auauna a le Atua, a’o lona fa’aaogaina foi o lana tama teine, e maua ai le avanoa e fa’ao’o ai le oti i a Ioane. O se fa’ata’ita’iga leaga ua faia e lea tinā i lana tama teine. O se feau aogā foi mo i

tatou uma o le fanau, aua le ola tau-lamalama i le isi tamaitiiti ae toa'aga e tatalo i le Alii e fesoasoani mai mo i tatou.

GALUEGA FAATINO: TALIGA FESILI

Tali i fesili ua tuuina atu.

1. E lelei le mea na faia e Herotia pe leai?

Tali: E leai.

2. O ai Herotia?

Tali: O le avā po'o le to'alua o Filipo

3. O ai Herota?

Tali: O le tupu o Iutaia / O le uso o Filipo.

4. O ai Filipo?

Tali: O le to'alua po'o le tane a Herotia. /O le uso o Herota.

5. Na fa'apefea ona oti Ioane?

Tali: Na fasiotia e auauna a Herota. / Na tipi lona ulu ma tu'u i totonu o le tanoa.

6. O ai e ana le togafiti lea na oti ai Ioane?

Tali: O Herotia.

7. Aiseā na ita ai Herotia iā Ioane?

Tali; Ina ua a'oa'i e Ioane iā Herota, e sā ona fai avā i le avā a lona uso o Filipo.

PESE: **Tulei 'ese.**

Tulei 'ese, tulei 'ese, tulei 'ese,
Avega mamafa uma o lo'u agaga
Tulei 'ese, tulei 'ese, tulei 'ese
Avega mamafa uma o lo'u agaga

Tali: O agasala uma lava Ia goto ifo i le moana
Tulei 'ese, tulei 'ese, tulei 'ese
Avega mamafa uma o lo'u agaga

Ave'ese, ave'ese, aveese
O agasala e malaia ai o lou agaga
Aveese, aveese, aveese
O agasala e malaia ai o lou agaga

Tali: O Iesu le togisala, Mo tagata uma lava
Aveese, aveese, aveese
O agasala e malaia ai o lou agaga
Sola 'ese, sola 'ese, sola' ese
Mai iā satani e fano ai o le agaga
Sola 'ese, sola 'ese, sola 'ese
Mai iā satani e fano ai o le agaga

Tali: Sola lava ia Iesu, E maua ia le filemu
Sola ese, sola ese, sola ese
Mai ia satani e fano ai o le agaga.

Rolled away, rolled away, rolled away
Every burden of my heart rolled away
Rolled away, rolled away, rolled away
Every burden of my heart rolled away

Ch: Precious blood shed for me
Cleansed and set me free
Rolled away, rolled away, rolled away
Every burden of my heart rolled away

Since my burden have all rolled away
Sweeter grows the love of God everyday
Since my burden have all rolled away
Sweeter grows the love of God everyday

Tali: If you are burden with sin
Let the Savior in
Then you burdens will all roll away
And you'll learn to love Him more day by day

A'OA'OGA:

1. Aua le ola tau-lamalama e a'afia ai le ola o le isi tagata.
 2. Ia lelei le amio auā e le gata ina fiafia ai tagata, a o le silafaga a le Atua.
 3. Aua le tete'e i fa'atonuga a ou matua.
-

MANATU TA'IALA O AOKUSO:

IA FAAMUAMUA LE ATUA

E to'atele tagata o lenei olaga ua o latou faamuamua o latou lava manatu, o lagona ma mana'oga i so o se mea o le lalolagi. Ua faapena foi i le tele o tupulaga i tama ma teine aoga, i lenei vaitau o le ola a'otauina. O nisi foi ua i ai le lagona o le faavaivai, a'o feagai ai ma le Koviti 19 i lenei vaitau o le olaga. O le feau o lenei masina, ina ia faamuamua le Atua, ona saogalemu lea ma manuia mea uma i le ola.

ASO SA: **6 AOKUSO 2023**

MATAUPU: **USITA'I MUAMUA.**

SINI: Ia malamalama le vasega, e tatau i tagata uma ona usita'i muamua i le Atua, e manuia ai.

TUSI FAITAU: 1 Samuelu 15:1-12.

FESOASOANI MO FAIAOGA:

O le faaupuga lava ua masani ona faalogo i ai e faapea, "Usita'i muamua, faitio mulimuli" (*Obey first, complain after*). E faamamafa ai le taua o le usita'i muamua i le faatonuga ma faatino. A mae'a ona faatino le faatonuga ua sa'o ma lelei, ona manuia lea ma fiafia. Ae a uma a'e le faatinoga, e lē lelei ma lē sa'o le mana'oga o le faatonuga, ona faato'ā faitio lea ma tomumu.

O Saulo, o le tama muamua lea na filifilia e le Atua, e avea ma tupu o Isaraelu. O le tagata sa malu ai le nuu ma manuia ai lona siosiomaga ma lona tulaga maualuga, pe a faatusatusa ma isi nuu i lea vaitau, aemaise lava i le tulaga i le tamaoaiga i faatoaga ma lafumanu. Sa lelei lona tula'i mai, e avea ma tupu o le nuu o le Atua. O le avea ai o Saulo e fai ma tupu, o le filifiliga lava na faia e le Atua. E alagatatau ai la ia Saulo, ona faalogo ma usita'i i faatonuga e finagalo i ai le Atua i soo se taimi.

Na tuuina e le Atua le faatonuga ia Saulo ina ia ō e faaumatiua uma Amaleka. O le tupu o Amleka ma tagata uma, se ia oo lava foi ia latou lafu manu ma mea uma, ia matua faaumatiua. O le mea ua tupu, ua lē usita'i Saulo i le faatonuga a le Atua. Ua ia faasaoina Akako le tupu o Amaleka, faatasi ai ma se vaega o le lafumanu a Amaleka, e pei o povi ma mamoe pepeti lapopo'a ma isi. O le mafuaaga lea na tiga ai le finagalo o le Atua ia Saulo, ona ua le usita'i ia te Ia. Ua tuu le faatonuga mai le Atua, a ua fai lava le mea ua ia loto i ai. O se faiga ua atagia ai le tagata ola faamaualuga, ma ua lē faamuamua le usita'i i le Atua, e ola manuia ai.

Ua a'oa'o mai lenei tala mo i tatou le fanau, ina ia o tatou toe mafaufau ai i o tatou olaga, po o faamuamua le ola usita'i, ae faamulimuli o tatou tu'inanauga. Sa tatau ia Saulo ona ia lē manatu i lona tulaga faa-tupu o le nuu, ae faalogo ma usita'i muamua i le faatonuga. A faatonu mai loa le Atua i se feau e fia fai, ona tuu ese lava lea o o tatou mamalu ma o tatou tofi, ae

usita'i muamua, auā o le faitoto'a lea o manuia e faasoa mai i le ola.

GALUEGA FAATINO: TAALOGA

O faatonuga o lo o tuuina atu i lalo, o loo faatulagaina i le tulaga sa'o i le faasologa. O le autu o le taaloga, ina ia vaai pe usita'i i ai le tagata taalo. Ia tusi i faatonuga uma. Ia tofu le pepa ma le faatonuga.

- Oso mai ni oso se lima.
- Pōpō le manava ma milimili le muaulu.
- Nofo i lalo ma osooso i luga. (vaai pe faatino pe leai)
- Ata ata ma usu se pese.
- Moiini ma savali solomuli.

(*E i ai faatonuga e foliga e lē mafai ona faatino e nisi o tamaiti. O nisi o le a faitio (complain) pe faapefea ona ona faatino, ona e lē mafai. O iina tonu lava o le a maua ai le uiga o le mataupu, e tatau ona usita'i muamua.*)

PESE: “Faalogo ma usita'i”

A'OA'OGA:

1. E lelei le usita'i muamua, e manuia ai.
2. Aua le fia poto i se faatonuga ua tuuina atu.

.....

ASO SA: 13 AOKUSO 2023

MATAUPU: O LE FAAMALOSIAU FAA-TAMĀ
(Aso Sa o Tamā)

SINI:

Ia malamalama le vasega i le taua ma le aoga o le faamalosiau a o latou tamā ina ia ola manuia.

TUSI FAITAU: 1 Timoteo 1: 1 – 5

FESOASOANI MO FAIAOGA:

O le Aso Sa lenei ua faapitoa lava mo nai o tatou tamā. E manatua ai o latou sao tāua i o tatou olaga. E mafua ona o tatou faamanatuina i tausaga uma, ona e tofu lava i tatou uma ma tamā, faatasi ai ma lo latou alolofa ua mafua ai ona o tatou saogalemu ma ola filemu.

O le tama o Timoteo, o se tama ola manuia, auā sa ola mai o ia i se aiga Kerisiano. O lona tamā o se tagata Eleni, e lē o tā'ua lona igoa, se ia vagana lona tinā, o Eunike lona igoa. Sa nonofo foi i latou ma Loi le tinā o lona tinā. Sa lelei le a'oa'oina o le tama o Timoteo i totonu lava o lona aiga, e ona matua ma lona grandmother (tinā o lona tinā) i le amio pulea ma amio lelei. O le oo ane o Paulo i le aiga o Timoteo, na iloa ai e Paulo, o le tama o Timoteo, e aoga tele i le galuega a le Alii. Ua fai ma ala ua mafuta ai Timoteo i le toeaina o Paulo. Ua fiafia ai foi e faalogologo i le faasoa atu a le toeaina e uiga i le Tala Lelei ia Iesu Keriso.

Sa faamanuiaina Timoteo, ona o ia o se tama usita'i. E lē gata i lea, sa tele foi lana fesoasoani i le toeaina o Paulo. Sa a'oa'oina e Paulo i le galuega faa-tagata-tala'i ma ua ia fiafia i ai. Sa oo lava ina galue o ia i le galulega tala'i i Efeso. O iina na iloa ai e Timoteo, e lē faigofie le avea ma tagata faigaluega mo Iesu. E lamatia le ola, aemaise lava i le tele o sauaga o tagata latou te talia le Tala Lelei ia Iesu Keriso i lea vaitau, e fitafita o le malo o Roma. O le mafuaaga tonu lea na tusi faamalosi atu i ai le Apostolo o Paulo, ina ia faamalosi i le galuega, ma ia finau pea e ta'u atu le Tala Lelei ia Iesu Keriso i tagata. O le manatu o le toeaina o Paulo, ina ia apoapoa'i atu pea ia Timoteo, e faamalosia ai lona finau i le galuega tala'i. Ua atagia ai i lea galuega ua faia

e Paulo, le tulaga faa-tamā i sona atalii ua ia fiafia i ai ma ua pele i lona loto. Ua matua faamoemoeina lava e le toeaina o Paulo le tama o Timoteo, ma ua faaupu lava e Paulo, o lona atalii faa-le-agaga. O le faamalosiau sili lea ona aogā mo Timoteo. O le alofa faa-tamā o le toeaina o Paulo, ua ia faamalosi atu ai ia Timoteo, ina ia finau ma faamalosi mo le galuega a le Alii o Iesu.

GALUEGA FAATINO: TUSI FAAMALOSIAU

Tusi sau faamalosi i le tagata o lo o i ou autafa. Apoapoa'i i ai i mea e manuia ai, ma fautua i ai i ni uiga lē lelei o lo o ia faia.

Faamalosiau i le tulaga o le ola a'oa'oina ma ia faatupu ai le fiafia e mafuta i le aoga Aso Sa.

Ia maua e lē o le a tuuina atu i ai le faamalosiau se lagona fiafia ma ia faamalieina le loto.

PESE: Faamalolosi.

Faamalolosi tau le taua lelei
O loo soifua le Atua e au ma tatou
Taofi mau i le faatuatua, Tataло pea
E lē toe mamao, o Ia

Ch: Galulue, manū o ao
A oo mai le po, e mālolo
Le auauna lelei, faamaoni
Ulufale maia, i le fiafia o lou Alii.

A'OA'OGA:

1. Faalogo ma talia upu faamalosi a nai o tatou matua.
2. E alolofa o tatou tamā ia'i tatou.

.....

ASO SA: 20 AOKUSO 2023

MATAUPU:

IA ONOSA'I MA MATAALA

SINI:

Ia malamalama le vasega i le taua o le tagata e onosa'i ma mataala, e faamanuiaina.

TUSI FAITAU: Mataio 25: 1 – 13

FESOASOANI MO FAIAOGA:

O le mataupu o lenei Aso Sa, o le faamatalaina o le faataoto a Iesu, e faatatau i le tagata mataala ma lava lona onosa'i, faapea ma le tagata lē mataala ma lē lava lona onosa'i. O taupou e toasefulu, na sauni ma tapena a latou moli, e o atu e faafetaia'i i le faato'afaiavā. Ua popoto le toalima o i latou, ae valea le isi toalima. O taupou valea ua ave a latou moli, ae le'i avea ni a latou suauu faaleoleo. O le faailoga o le lē mataala. A o taupou popoto ua ave a latou moli faatasi ma a latou suauu faasili. O foliga ia o le tagata e mataala ma tapenapena lelei.

Ua faatuai ona sau le faatoafaiava, ona momoe ai lea, auā ua lē onosa'ia le nofo faatalitali. Ua faafuasei ona sau le valaau. "Faauta, ua sau le faatoafaiava, ona o atu ai lea e faafetaia'i iā te ia. Ua taufaitutu i luga taupou e toasefulu, ma tapenapena a latou moli. Peita'i na aisi atu taupou valea i taupou popoto, mo nai suauu mo a latou moli, ona ua mu itiiti. O le tali atu o taupou popoto i le aisi ane o le au lē mataala, o le leai, ina nei lē lava a latou suauu, ae sili ona latou o e faatau mai ni a latou suauu.

Ua taunuu atu le faatoafaiava ona latou ulufale faatasi lea ma taupou popoto e toalima, a'o le isi toalima e taunuu atu ua tapuni le faitotoa.

Ioe tamaiti, aua e te manatu māmā, pe faatauvaa lau vaai i le valaauina o oe. O le a le galuega ua valaauina ai oe e le Atua, ia e onosa'i ma mataala, ae aua le ola faatamala. O le mataala tamaiti, o le ola tapenapena lelei.

Uiga o Upu:

- i) faatoafaiavā - tagata faatoa fai le toalua, faatoa faaipoipo
- ii) tausamaaga - o se aiga tele.

GALUEGA FAATINO: Taligā Fesili. (Tali)

1. O ai tagata o lo o i ai i le tala?
2. E to'afia tagata onosa'i ma mataala o lo o i ai?
3. E faapefea ona iloa taupou mataala?
4. O le a le i'uga o le lē onosa'i ma le lē mataala?

PESE: Suau'u i lau Lamepa

1. Suau'u i la'u lamepa ia mu pea
Suau'u i lau lamepa ou te tatalo
Suau'u i la'u lamepa ia me pea
Ia mu pea seia tafa mai o ata.

Tali: Pese Osana pese osana
Pese osana i le tupu o tupu
Pese osana pese osana
Pese osana i le tupu o tupu

Give me oil in my lamp keep it burning, burning, burning
Give me oil in my lama I pray
Give me oil in my lamp keep it burning, burning, burning
Keep it burning til the end of day.

Give me joy in my heart, keep me singing
Give me joy in my heart, I pray
Give me joy in my heart, keep me singing
Keep me singing til the break of day.

Give me love in my heart, keep me serving
Give me love in my heart, I pray
Give me love in my heart, keep me serving
Keep me resting til the break of day.

Chorus: Sing Hosanna, Sing Hosanna,
Sing Hosanna to the King of kings
Sing Hosanna, Sing Hosanna.
Sing Hosanna to the King of kings

Give me peace in my heart, keep me resting
Give me peace in my heart, I pray
Give me peace in my heart, keep me resting
Give me peace til the break of the day

A'OA'OGA:

1. Aua le faavaivai gofie.
 2. Ia mataala i taimi uma.
 3. E lē iloa e se tasi le taimi e afio mai ai le Alii.
-

ASO SA: 27 AOKUSO 2023

MATAUPU: FAIGAUO E FAAVAE I LE ALOFA.

SINI: Ia malamalama le vasega, i le lelei o se faigauo e faavae i le alofa.

TUSI FAITAU: 1 Samuelu 19:1-7

FESOASOANI MO FAIAOGA:

O le uo, o se tagata ua e faamoemoeina ma e masani lelei ai. O le tagata ua e alofa i ai, ma talitonuina. E mafai ona taaalo faatasi, tafafao faatasi, aai faatasi, ma faaso faatasi. O le olaga lea sa molimauina i le faigauo a Tavita ma Ionatana. E mafanafana le

mafutaga, ona ua masani le tasi i uiga o le isi. O foliga vaaia lea o le faigaau o lo o faavae i le alofa o le isi i le tasi.

O le tasi aso, sa tupu tele ai le leaga ma le ita i le loto o le tupu o Saulo ia Tavita. Na manatu ai Saulo le tupu, e tatau ona fai se faiga e aveese ai Tavita mai lona olaga o aso uma. O le ala lea na ia faatonuina ai lona atalii o Ionatana faatasī ma ana auauna, ina ia o latou faaoo le oti ia Tavita. O le mafuaga o le ita o Saulo ia Tavita, ona ua iloa e Saulo, ua to'atele tagata ua o latou fiafia ia Tavita nai lo o ia le tupu. E lē talia e Saulo lea vaaiga, ona o ia o le Tupu, e tatau ona viia ma fiafia mai tagata o lona malo ia te ia, nai lo o se isi lava tagata. Ua na o le pau lava le gaioiga e tatau ona faia, o le saili lea o se auala ina ia fasiotia ai le tama o Tavita. A o Tavita, sa ia te ia le Agaga o le Alii.

Ua sauni auauna a Saulo ina ia faaoo le oti ia Tavita. Ona alu ai lea o Ionatana le atalii o Saulo, ua faamatala ia Tavita lana uo, o loo mana'o lona tamā ina ia faaoo le oti ia te ia. E tatau ia te ia ona alu ina ia saili se mea lilo e lafi ai. O le alofa o Ionatana i si ana uo o Tavita, ina nei afaina i le mana'o o lona tamā o Saulo. A'o Tavita, e leai sana agasala po o sana agaleaga sa faia ia Saulo le tupu. Ua na o lona usita'i lava i faatonuga uma a le tupu, tusa lava po o le a le faigata, e usita'i lava ma faatino. O le mea ua faia e Ionatana, o le pine faamau lea o le uo e alofa faamaoni i lana uo.

GALUEGA FAATINO: TUSIGĀ SOLO

Tusi mai se solo e faatatau i lau uo. Pule lava oe i le umi, ae tasi le fuaiupu.

Faata'ita'iga:

*O a'u e fai la'u uo i le aoga
Ma te taalo ma aai faatasī pe a ta le malologa
E alofa, aulelei toe lapo'a
E ita o ia pe a lē maona.*

PESE: Spirit of the living God

Spirit of the living God,
Fall a fresh on me
Spirit of the Living God,
Fall a fresh on me
Melt me, mold me, fill me, use me
Spirit of the Living God, fall a fresh on me.

A'OA'OGA:

1. Ia faamaoni le alofa o le isi i le tasi.
2. Aua le taulamalama pe a e ita.

.....

MANATU TA'IALA O SETEMA:

IA SALAMŌ FAAMAONI

O le masina lenei e faamanatuina ai pea le oo mai o le Tala Lelei i laufanua o Samoa e pei ona faamanatuina pea i tausaga uma. Ua manatu ai, i le uiga o le Tala Lelei ma le tāua o le Tala Lelei. O le upu moni, e lē moni le Tala Lelei, pe a leai se faamaoni, pe a leai foi se loto salamō

ASO SA: **03 SETEMA 2023 (Aso Sa o le Talalelei)**

MATAUPU: **IA AVEA MA TALA E LELEI.**

SINI: Ia malamalama le vasega, sa fa'atasi pea le Atua iā Iosefa, ina ia fa'aolaina lona aiga ma tagata o lona nuu, aua ua uma ona filifilia lava o ia e le Atua.

TUSI FAITAU: Kenese 45: 25 – 28

FESOOASOANI MO FAIAOGA:

O Iosefa sa agaleagaina e ona uso, ma latou fa'atau 'ese atu ai i tagata Mitiana. Ona latou o atu lea ma fai le tala pepelo i lo latou tamā o Iakopo ua oti Iosefa ua aina e se manu fea'i. A o le mea moni na tupu, na latou fasi le manu ma fufui ai le ofu o Iosefa i le toto o le manu, ona foi lea i lo latou tamā ma fai atu le tala, ai ua aina e se manu fea'i, na o le ofu na latou maua. Ua tatou iloa na manuia le olaga o Iosefa i Aikupito, ina ua tofia e pulea le nu'u i le taimi o le oge. Ona o atu ai lea o uso o Iosefa e fa'atau mai ni a latou mea'ai i Aikupito. Na fa'ailoa i ai e Iosefa o ia lea, ma lona mana'o ina ia foi e aumai lo latou tamā o Iakopo.

O le vaega la lea sa tatou faitauina i lenei taeao tamaiti. Ua fo'i ane uso o Iosefa mai Aikupito e ā i Kanana ma le tala fiafia i lo latou tama, o lo o ola pea Iosefa lona atalii. O se tala sa tupu ai le fiafia o le toe'a'ina o Iakopo, ma mana'o ai loa se'i alu e va'ai i lona atal'i. Fai mai le toe'a'ina, "Soia, o lo o ola mai pea lo'u atalii o Iosefa, ou te alu, ma te feiloa'i ma ia, manū ou te le'i oti" Manatua, ua manatu lava Iakopo ua oti si ona atalii, a'o lea ua toe avatu e ona uso le tala e le'i oti, o lo'o ola pea Iosefa. O le Tala Lelei lea mo le toeaina o Iosefa. Peita'i o le ola pea o Iosefa, ua iā te ia fa'amaniuga mai le Atua. Na mafua ona toe feiloa'i Iosefa ma ona uso, ona o fuafuaga a le Atua. O Iosefa ua uma ona filifilia e le Atua mo le fa'ailoa atu o lona finagalo. Filifilia e le Atua e fai ma fa'aola i lona aiga. (Fesootaiga)

Ioe tamaiti, e fa'apenā tatou, e filifilia i tatou e le Atua mo ana fea'u ma ana galuega 'ese'ese. O tatou o lo o fa'amoemoe mai i ai o tatou aiga mo se lumana'i lelei, ia tatou pei o Iosefa sa fai ma fa'aola i lona aiga i taimi o le oge tele. O le vala'auina o tatou e le Atua e fa'amoemoe ina ua tatou savavali e tusa o lona finagalo. Ia manuia tele outou le fanau.

GALUEGA FAATINO:

A'oa'o ia maua lelei igoa ia o le fanau a Iakopo.
Reupena, Simeona, Levi, Iuta, Tanu, Nafatali, Kato, Asera, Isakara, Sepulona, Iosefa, Peniamina.

PESE:

LE ALOFA O LE ATUA E OFOOFOGIA
[GOD'S LOVE IS SO WONDERFUL]

Le alofa o le Atua e ofoofogia x3
Le alofa silisili lea mo a'u
E maualuga ou te lē a'eina
E maulalo ou te lē māuluina
E lautele ou te lē opoina
Le alofa silisili lea mo a'u
God's love is so wonderful x3
O wonderful love
It's so high you can't get over it
It's so low you can't get under it
It's so wide you can't get around it
O wonderful love.

A'OA'OGA:

1. E fa'aaogaina i tatou e le Atua i le lumana'i mo so o se feau.
2. E avea i tatou ma fa'aola i ā tatou aiga pe ā fa'amuamua ma fa'atuatua i le Atua i taimi uma.
3. Fa'amoemoe ma fa'alagolago i le Atua e manuia ai o tatou faiva.

.....

ASO SA:

10 SETEMA 2023

MATAUPU:

E FAAILOA E LE ATUA LE MEA MONI

SINI:

Ia malamalama le vasega o le Atua e fa'aalia le mea moni ma le sa'o i ona tagata mafatia.

TUSI FAITAU:

1 Tupu 3:16-27

FESOASOANI MO FAIAOGA:

O le olaga ua masani ai le tele o tagata i lenei olaga, ma ua aafia ai foi le toatele o tatou le fanau, o le ola tala pepelo. O nisi lava o tagata, ua fai ma masani, ma ua avea a latou tala pepelo, e fai ma tala moni i nisi o tagata. Peita'i, o le Atua, e lē finagalo i le tala pepelo. O lona lava finagalo, o le faailoa o le mea moni ma le faamaoni. E saunia foi e Ia auala e faailoa ai le mea moni i ona tagata ua mafatia ma afaina talu le pepelo o le isi.

O le tatou mataupu i lenei Aso Sa, o lo o faamatalaina ai le auala a le Atua e faailoa ai le mea moni ma le faamaoni, i le finauga a tinā e to'alua, po o ni fafine se to'alua sa nonofo faatasi i le fale e tasi. Sa na o laua lava lo la fale. Na fanau le pepe a le isi fafine, ma ua fiafia lava lona loto. Ua mavae aso e tolu, ona fanau ai lea o le pepe a le isi fafine. Sa tofu nei fafine ma le pepe, ma ua fiafia uma i laua. Peita'i, o le tasi aso, e malamalama ifo le taeao, ma ua tago ifo le fafine sa fanau muamua i lana pepe, e lē o foliga ia o lana pepe. I le ma lea, ua uma le ola o si pepe.

Sa o nei fafine e toalua i luma o le tupu o Solomona, ma ua fai ai le finauga i pepe. Sa finau le tinā lea na muamua fanau ma ia fai atu i le tupu, “*Ua oti le tama a lenei fafine i le po; auā ua tatao o ia ia te ia (pepe). Ona tula'i lea o ia i le tulua o po ma ao, ua ave ese la'u tama sa ia te a'u, a o moe lau auauna fafine. Ua ia faataoto ia te ia i lona fatafata, a ua faataoto mai e ia lana tama ua oti i lo'u fatafata. Na ou nofo i luga i le taeao e faasusu i la'u tama, faauta ua oti ia; ua ou matuā matamata i ai i le taeao faauta, e le o la'u tama tane na ou fanaua*””. Sa finau mai le tinā o lo o i ai le pepe o lo o ola, e pepelo le tala a le tinā o lo o i ai le pepe ua oti. O lana pepe lava o lo o ia te ia.

Sa faia e le tupu o Solomona le faamasinoga o nei tinā ma a laua pepe. O lea na ia faatonuina ai ana auauna, ina ia aumai se pelu, ma ia isi lua le pepe o lo o ola, ina ia avatu le isi itu i le tasi, a o le isi itu i le isi. Sa faateia le tupu i le faapea atu o le tinā moni o

le pepe o lo ola, “Le alii e, avatu le tama o lo o ola ia te ia, aua lava ne i fasioti ia te ia”. O le lagona a le tinā e faamaoni lona alofa i si ana tama.

Peita'i le tinā pepelo, lē faamaoni, leai se alofa, sa ia finau atu ina ia faia le finagalo o le tupu, o le isi lua lea o si pepe. O le lagona o le tinā e le o i ai se alofa, ona e le o sana pepe moni.

O le faaiuga a le tupu sa faia, na ia toe faafoi le pepe o lo o ola, i lona tinā moni, lea na talosaga ina ia aua nei faaoo le oti i si pepe. O le auala lava lea ua faia e le Atua, e faailoa ai le mea moni. O le faailoga o le Atua e moni ma faamaoni ana faamasinoga ma faaiuga e faasaoina ai le tagata ua aafia ma afaina ona o le pepelo o isi tagata. Ua faamanatu mai ai mo i tatou uma le fanau, ina ia aua lava le ola pepelo, auā e silafia e le Atua lau pepelo, e tapena foi e le Atua le auala e faailoa ai le pepelo.

GALUEGA FAATINO: TA'UTINOGA

1. Tuu le avanoa i le vasega e ta'utino mai ai lava le tama ma le teine i sana pepelo sa fai, ae na aafia ai le isi tamaititi, ae na maua lana pepelo.
2. E lē afaina pe afai e i ai se isi e leai sana pepelo sa faia.
3. O le lagona lava o le tagata ia i lona lava loto, e ta'u ai le mea moni sa ia faia, e ala i lana pepelo sa fai.
4. E lē o le tāua o lenei galuega faatino le faailoa o le pepelo, a o le feau mo fanau e leaga le pepelo.

PESE: E lo'u Alii ua ou sesē (136 Pese ma Viiga)

A'OA'OGA:

1. Ia faamaoni ma aua le ola pepelo.
2. E lē mana'o le Atua ina ia o tatou ola pepelo.

.....
ASO SA:

17 SETEMA 2023

MATAUPU: **E LĒ LELEI LE TAUFAAVALEA**

SINI: Ia malamalama le vasega, o le taufaavalea
o se uiga leaga toe lē alofa.

TUSI FAITAU: Mareko 10:17-22

FESOASOANI MO FAIAOGA:

O le taufaavalea, e olaina e le tagata pepelo, tagata tofotofo ma isi uma uiga faapena. O se tu ma se aga ua faafoliga lona faatinoga.

O le momo'e ifo o le tasi tagata ia Iesu ma tootuli, o le faailoga o le tagata ua sulufa'i ane ma ua moomia vave se fesoasoani ona o se mafatiaga i lona olaga. E le gata i lea, o se faatinoga o lo o atagia ai le iloa lelei e lē sa momo'e ifo, o Iesu e maua ai le tali o le ola faavavau. O lea lava o lo o manino "*le a'oa'o lelei e*", o le ata manino o le mautinoa lelei, o Iesu, o le a'oa'o. E le o pogisa i lea tagata le talaaga, ma le tulaga o le Alii o Iesu i le lalolagi, pe a fua i le faatinoga, o le tootuli i luma o Iesu.

Peita'i, o le faatinoga ma le augani atu po o le fesili atu a le tagata na momo'e atu ia Iesu, ua na o se faatinoga i le vaaiga o mata a tagata sa i ai i lea taimi. O le uiga o le manatu, ua na o se ata faafoliga, ae le o i ai atoa le loto.

E mafai foi ona faapea, o se faatinoga e foliga o se tofotofoga, ina ia tofotofo ai le faamaoni o Iesu ma lona i ai i le lalolagi, aemaise lava i le itu, o Ia o le Alii, o le Mesia, o le Faaola, o le Alo o le Atua.

"Le a'oa'o lelei e, se a se mea ou te faia ina ia ou maua ai le ola faavavau?".

O se fesili o lo o matuā manino mai ai le malamalama o lē o lo o fesili, o le ola faavavau, o le nofoaga o lo o tausili i ai so o se tagata faatuatua. E malamalama i tulafono a le Atua e pei ona tuuina mai le amataga. Peita'i, ua na o le iloa o le tulafono, ae musu e ola i le tulafono. Afai o le tulafono, e faavae i le alofa, o lona uiga, e le o ola la i le tulafono, ona e musu e foa'i ma tufa atu ana oloa mo e matitiva. E iloa le alofa, ae le iloa le faatinoga o le alofa.

O lo o manino lava le tala i le fuaiupu e 22, o lē na alu ifo ia Iesu, o le tagata e tele ana oloa. E lē fesiligia foi lona tulaga i totonusi o le sosaiete o tagata, o ia o se tagata taualoa. O le alu ifo ia Iesu, e foliga o le tagata ua manino i le faa-le-agaga, pe a fua i le fesili i se auala mo le Malo o le Atua. E foliga ua musu i le faa-le-tino. Peita'i, ua leai. Ua malamalama ma manino i le tulafono, ae sili lona malamalama ma manumanu i ana oloa faa-le-tino. E musu e tufa atu ana oloa i e matitiva, ma le lilo i manatu, o le auala lea i le ola faavavau. E le mana'o e aveese le oa ua fai mona atua i le lalolagi. Ae o le fesili, pe aisea la na alu ifo ai ia Iesu ma tootuli i ai, ma fesili fua i ai? O le mea tonu a lea o le taufaavalea. O le alu fua e fesili, ae o lo o ia iloa lona tali. Ua faafoliga le alu ifo e fesili i le Alii, ma ua maumau ai le taimi o Iesu i le tagata taufaavalea.

GALUEGA FAATINO: FAATINO LE TALA

Ia faatino e le vasega le tala, ma ia fesoasoani lau susuga i le faiaoga. E talitonu le taofi, ua faalogo soo foi i lenei tala. O le ala lea e tāua ai le faatinoina o le tala, e saga manatua ai pea.

PESE: **Lafo avega iā Iesu**

Lafo 'avega iā Iesu
E alofa iā te a'u
Lafo 'avega iā Iesu

Tali: E alofa iā te a'u
 Luga, luga, luga, luga, luga, luga
 Luga, luga, si'itia Iesu i luga
 Lalo, lalo, lalo, lalo, lalo, lalo
 Lalo, lalo, soli Satani i lalo

Cast your burdens unto Jesus,
 He cares for you
 Cast your burdens unto Jesusu,
 He cares for you

Ch: Higher, higher, higher, higher, higher,
 Higher, higher, lift Jesus higher.
 Lower, lower, lower, lower, lower, lower.
 Lower, lower, stomp Satan lower.

A'OA'OGA:

1. Aua le ola faa-foliga e lē lelei.
 2. Aua le faamuamuaina le oa i lou olaga.
-

ASO SA: **24 SETEMA 2023**

MATAUPU: **O LE FAFINE TUA PI'**

SINI: Ia malamalama le vasega i le faamaloloina e Iesu o le fafine tua pi'o.

TUSI FAITAU: Luka 13:11-13

FESOASOANI MO FAIAOGA:

O le tala o lenei Aso Sa, o loo faatatau i le fafine po o le tinā ua sefulu ma le valu tausaga o savali faano'uno'u, e lē mafai ona tu sa'o. O lo o manino i le tala na faitauina, sa i lea fafine le agaga e vaivai ai lona tino. O lo o atagia mai ai le mafuaaga o le lē mafai ai ona faasa'o le papātua o lea fafine ona o le agaga leaga po o Satani.

E lē itiiti ia tausaga na feagai ai le tinā po o le fafine ma le gasegase o lona tua, pe a fua i le sefulu ma le valu o tausaga. O le tagata ua umi ona tauave le faigatā o lea ituaiga gasegase, ona o faiga a Satani, ma ua moomia ai le sa'olotoga e soifua fiafia ai ma sa'oloto ai i aso uma o le ola. Atonu o le ala lea o le auai o le fafine i le sunako, se'i faalogologo i le a'oa'o mai o le Faaola o Iesu, ma se'i silasila mai ai Iesu i lona mafatiaga o lo o ia tauaveina. Ma o lea lava na taunu, ina ua silafia ma iloa e Iesu. E le gata ua iloa e Iesu le fafine, a ua valaau i ai. O le faailoga o le alofa o le Alii ma lona agalelei i le tagata ua moomia le fesoasoani. O le faae'e o aao o le Alii i luga o lea fafine, o foliga ia o le faamanuia atu o le Faaola i ona tagata e talitonu i lona mana. E le gata o le faamalologa ua faia, ae ua tuuina atu i ai ma le faamanuia, e ola fiafia ma ola sa'oloto ai i aso uma o le ola. O le manaia ia o le tali atu a le fafine ina ua faasa'olotoina e Iesu lona tua pi'o. O le taimi lava na malolo ai, na vivii ai i le Atua. O le vivii ua faaleoina ai le loto faafetai i le Atua, ona ua aveeseina Satani leaga, sa faapologaina lona ola mai tausaga e sefulu ma le valu. O le faafetai i le Atua o lo o faailoa ai mai ai le loto talitonu o lea fafine, ua na o le Atua lava i lona mana faaola, e maua ai le sa'olotoga moni mo le tagata vaivai. O le mana lea o le Alii ma lona alofa, ua sa'o ai lona tua sa pi'o, ona o le agaga o Satani.

GALUEGA FAATINO: **TALI "SA'O" PO O LE "SESĒ"**

1. O Susana Peteru le igoa o le tinā o lo o i le tala. (Sesē)
2. O le amo popo na mafua ai ona pi'o le papatua o le tinā. (Sesē)
3. E 18 tausaga na maua ai lenei tinā i le tuapi'o. (Sa'o)

4. E mafua ona savali faano'uno'u le tinā ona o le agaga
leaga sa ia te ia. (Sa'o)
5. Na uma loa ona faamalolō le tinā, moe loa ua lē lava.
(Sesē)
6. Sa talitonu le fafine na pi'o lona tua, ua na o le mana o le
Atua e malolo ai. (Sa'o)

PESE: O lima galue ma vae momo'e.

O lima galue ma vae momo'e
Meaalofa a le Atua mo a'u ma oe
O lima galue ma vae momo'e
E fesoasoani i le aso atoa

Hands to work and feet to run
God's good gift for you and me
Hands and feet He gave to us
To help each other the whole day through

O mata e va'ai taliga e fa'alogo
Meaalofa a le Atua mo a'u ma oe
O mata e va'ai taliga e fa'alogo
E fesoasoani i le aso atoa

Eyes to see and ears to hear
God's good gift for you and me
Eyes and ears He gave to us
To help each other the whole day through

A'OA'OGA:

1. E malolo tagata uma ia Iesu.
2. E lē manumalo Satani ia Iesu.
3. Ave ia Iesu ou tiga ma ou ma'i.

.....

**MANATU O TAIALA O OKETOPA:
AVE LE FANAU I LE ATUA**

O fanau e pei o fugalaau i le faatoaga o le ola. “*Children are like flowers in the garden of Life*”. O le tasi lenei o faaupuga e iloa ai le taua tele o fanau i totonu o aiga. E leai lava se matua e manao e ola femēmēa'i ma fālōlo lana fanau. O le naunautaiga lava ia ola fiafia ma manuia le fanau. Auā o fanau o meaalofa taua mai le Atua, e pei ona molimau ai le fai-Salamo. E taua le ave o le fanau i le aoga, ina ia maua le poto ma le atamai auā galuega lelei mo le lumana. A o le mea sili ona taua, ia ave le fanau i le Atua. Auā o le Atua e maua ai le malosi sili ma le faautauta lelei, e mafai ai ona faafesagai fanau ma luitai ma suiga malolosi o laasaga eseese o le ola nei, o le a ulufale atu ai i latou. O le upu a le poto “O le matau i le Atua o le amataga lea o le Poto.”

ASO SA: 22 OKETOPA 2023

MATAUPU: O FANAU O U FANAFANA I LE LIMA O LE TOA

SINI: Ia malamalama le vasega, o i latou a faa-faileleina mai lima o matua e fai ma u fanafana e momoli le talalelei i tuluiga o le lalolagi.

TUSI FAITAU: Salamo 127: 3 – 5

FESOOASOANI MO FAIAOGA:

O le Salamo lenei, e mafai ona faaulatalaina “O faamanuiaga i totonu o aiga,” a o faamanuiaga e maua mai i le fanau. O le

Salamo e 127 na tusia e Solomona le atalii o Tavita. A o Solomona foi na tusia le tusi o Faataoto lea e faatauaina ai le aoaiga lelei mo le fanau.

“Faauta o le fanau o le tofi lea mai le Alii” - O le uiga o lea faaupuga, o fanau e fa’aaauua gafa o aiga, latou te tausia measina a aiga, e pei o suafa matai, lauelele ma fanua. Latou te tausia aiga ia tumau sootaga faale-aiga i le ola fealofani.

“O e ua fanau mai o le taui lea mai ia te ia” - E mafai ona faasino lea faaupuga i matua. Afai e faavae le mafutaga a le tamā ma le tinā i le alofa faamaoni, o le alofa foi lea e a’oa’o ma tausi ai le fanau. Afai e matutua le fanau e fua mai foi a latou feau ma galuega i fua lelei o le alofa. O le Atua o le alofa lava ia.

“E pei o u fanafanau i le lima o le toa,” - O ‘u fanafana,” o lo o faatatau i fanau. A oo ina fana le u ma lele i se taunuuga mamao, e i ai lona mafuaaga. E mafai ona faatusa i se feau taumolimoli o le filemu po o se taua. Ae mafai foi ona avea ma u fanafana e faaumatia le fili. O fanau e tausia le nofo filemu o aiga, ae a le lelei upu e a’oa’i ai fanau, e avea foi latou ma mafuaaga e ola fevaevaeai ai aiga i le lumanai.

“E faapea lava atalii o taulelei.” O le talitonuga faa-Iutaia i le feagaiga tuai, e faataua tele atalii, po o le fanau tama. E tai tutusa lava ma tatou i Samoa. E mafua lea tulaga, ona e faapea o fanau tama o le malosi. E latou te faia galuega mamafa. A o le upu lava ia atalii i lona aotelega o lo o faatatau lava i fanau. E aofia ai le atalii ma le afafine. E tutusa tagata uma ia Keriso. Lea e i ai le faaupuga masani, “O tatou o atalii ma afafine o le Atua – ‘We are sons and daughters of God.’” “Amuia le tagata ua tumu ai lana utu.” - o se aiga e ola ma savavali fanau i ala o le malamalama o le Alii, o se aiga manuia.

“E le mama i latou pe a latou tautala i le faitotoa ma e ita mai.” - O le salamo lenei ua tusia e Solomona lea na foai e le Atua le poto ma le atamai e faamasino ai lona nuu. Po o le a lava le vaai maulalo o tagata ma le matitiva o se aiga, ae a popoto ma atamamai le fanau, o se aiga faaeaina ma taulelei. E mitamita matua e talanoa ai. E aveese ai foi le vaai maulalo mai o isi aiga.

A o le mea taua, ia popoto ma atamamai le fanau i le Alii. “O le matau i le Alii, o le amataga lea o le poto.”

GALUEGA FAATINO:

I. Faamatala mai po o ai o lo o faatatau ai faaupuga nei:

1. ‘O u fanafana.’

Tali: O fanau.

2. ‘I le lima o le toa’

Tali: O matua.

3. ‘Amuia le tagata ua tumu ai lana utu’

Tali: O aiga ua tumu i fanau (toatele fanau).

4. ‘E le mama i latou pe a latou tautala i faitotoa’

Tali: O matua, e mimita i a latou fanau.

5. ‘Ma e ita mai.’

Tali: O e faasagatau mai, fili.

PESE: Tamaiti omai

A’OA’OGA:

1. O le a’oa’iga lelei e manuia ai fanau.

2. O fanau o le lumanai manuia o aiga.

3. O fanau o ave feau mo le Talalelei.

.....

ASO SA: **29 OKETOPA 2023**

MATAUPU: **TUMAU I LE ATUA, TETEE I LE TIAPOLO**

SINI: Ia malamalama le vasega e ao ona tumau i le Alii, e ui i le tele o mea e taumafai le tiapolo e faatoilaloina ai latou.

TUSI FAITAU: 1 Peteru 5: 6 – 10

FESOASOANI MO FAIAOGA:

“Fai muamua nai fesili e toe faamanatu ai Peteru lea na tusia, le tusi lenei.”

1) O ai foi Peteru tamaiti?

Tali: (So'o o Iesu)

2) O ai le isi igoa o Peteru?

Tali: O Simona

3) O le a le uiga o le igoa Peteru?

Tali: Papa (rock)

4) O ai foi le so'o lea na faafiti i le Alii?

Tali: O Peteru

O le tusi lenei na tusi atu ai le Apostolo o Peteru e faamalosiau ai i le au Kerisiano i Asia Itiiti (Turkey). O le vaitaimi tonu lea na sili ona feagai ai le au Kerisiano ma sauaga ma puapuaga ona o le Tala Lelei e uiga ia Iesu Keriso. E le gata o sauaga i le tino a o lagona foi ma manatu o le au Kerisiano i le Alii, ua amata ona vaivai ona o le tiga o sauaga ua feagai ma i latou. O le uiga o le feau a le Apostolo, afai ua vaai faatauvaa ma faamaualaloina i latou ona o le Alii, ia tumau ma talitonu o latou loto i le Atua. Auā o le Atua, o le Atua malosi na te toe faaeaea i latou i lona Alofa Tunoa, o le uiga lea o le fuaiupu e ono.

“O le mea lea ia faamaualalo ai outou i lalo o le aao malosi o le Atua, ina ia faamaualugaina outou e ia i ona po e tatau.” A oo foi ina feagai le tagata ma sauaga ma puapuaga, e le maua se filemu, e popole ma leai se toamalie. O mea uma e popole ai le tagata, ia tatalo ma tau atu i le Alii, e le mafai ona tuulafoa'iina o ia e le Atua, e silasila mai ona fofoga alofa ua faamafanafana i tiga ma faigata e mafatia ai. O le isi feau taua o le tala lenei – ‘Ia faautautua ma mataala.’ O le tiapolo, e le mapu, e taumafai lava e faatoilalo le tagata, o lo o fealualuai o ia e pei o le leona tagi, ma saili se tasi e aina e ia.” Ia faautautua ma mataala le tagata, auā e i ai taimi e suamalie ma matagofie ai i le vaai i faiga a le tiapolo.

“Ia outou tetee atu ia te ia (tiapolo).” Pau lava le mea e malosi ai le tagata, e tetee atu i le tiapolo, o le faatuatua, ia talitonu ma le loto atoatoa ia Iesu Keriso. O Iesu Keriso, o ia na feagai ma sauaga ma puapuaga mataga ona o le agasala a le tagata. Ae na ia faatoilaloina le tiapolo ina ua toetu manumalo mai le oti, lea ua tatou manumalo faatasi ai ma Ia, ma ua maua ai le malosi e mafai ai ona tatou tumau ia te Ia i le salamo, ma tetee atu ai i le tiapolo e ala i le faatuatua faamaoni.

GALUEGA FAATINO: FAAFETAUIGA (Matching)

Faafetaui mai po o ai e faatatau ai faaupuga nei.

- | | |
|---|----------------------------|
| 1. I lalo o aao malosi (vi) | (i) au kerisiano |
| 2. Ia tuuina atu ia te ia mea uma tou te popole ai (iv) | (ii) tiapolo |
| 3. o lo o fealualuai e pei o le leona tagi (ii) | (iii) Iesu Keriso |
| 4) Ia outou faautauta, ia outou mataala (i) | (iv) o e ua sauaina |
| 5) O le na valaauna i tatou ia iu atu i lona mamalu (iii) | (v) Peteru
(vi) Le Atua |

PESE: A tumau ia Iesu.

A'OA'OGA:

1. Ia faautauta ma mataala.
 2. Tatou te malosi ona o Keriso.
 3. E faatoilaloina e le tiapolo, ae faamaualugaina ona o Keriso.
-

MANATU TA'IALA O NOVEMA: FAAMALOSI I LE VALAAUINA

E eseese lava tofiga ma valaaufina o le tagata e le Atua. O le filifiliaina o le tagata i se tofiga ma se valaaufina, o le finagalo o le Atua ina ia faamalosi ma fa'aaogaina i ai le malosi atoa, ma le loto atoa o le tagata i le faatinoga. E faapei foi o i tatou o faiaoga ma fanau mo le Tala Lelei faasalalau a Keriso.

ASO SA: **5 NOVEMA 2023**

MATAUPU: **UA FILIFILIA E LE ATUA KITIONA
E FAI MA TOA**

SINI: Ia malamalama le vasega e valaaufina foi e le Atua le tagata fa'atauva'a e fai ma ana auauna.

TUSI FAITAU: Fa'amasino 6:11 – 18

FESOOASOANI MO FAIAOGA:

E eseese lava le tagata ma lona faamatalaina o le toa. I se lagona o le mataupu, o le toa o se tagata e malosi le tino, e lē pala'ai le

loto, ae lelei le mafaufau. E lē o se toa le tagata malō vale ma so'ona fai mea leaga e a'afia ai nisi tagata. O le toa foi e na te pulea lelei lona loto.

O Kitiona o le atalii o Ioasa le sa Apieserū. Sa ola mai le mativa o lona aiga. O Kitiona foi sa ia sasa saito i le mea e soli ai vine ina ia lilo ai ia Mitiana. O le galuega a Kitiona ina ia lalafi ai lona aiga, mai le sauā o Mitiana i lea vaitau. A'o faia le galuega lea a Kitiona, na fa'aali i ai le agelu ma fa'apea atu iā Kitiona; **"Oe na le toa malosi, o iā te oe le Alii"**. Ua tali atu Kitiona i le agelu; **"E! le Alii e, se ā le mea ua o'o mai ai nei mea uma ia te i matou; o ifea ona vavega na ta'u mai e o matou tamā ia te i matou"**.

E le'i mafaufau Kitiona o le ā filifilia o ia e le Atua e fai ma toa e alu e tau le taua ma Mitiana. Peita'i, o le valaaufina o Kitiona o le fe'au lea mai le Atua. Ua tu'u i ai e le Atua le malosi, o le poto ma le mafaufau lelei, ina ia lavea'iina Israelu mai lima o Mitiana.

Fai mai upu o le tali a Kitiona; **"fa'auta mai, ua topito ona fa'atauva'a lo'u aiga i Manase; o a'u foi, o le aupito itiiti i le aiga o lo'u tamā"**. O le iloa lelei e Kitiona, o lona tulaga maulalo ma le faatauvaa. O si ona aiga e mativa ma vaivai, aemaise o ia e laititi. O foliga o le tagata loto maulalo, ae toa.

Ona tali lea o le agelu; **"Auā ta te fa'atasi lava ma oe, e te fasia foi Mitiana, e peisea'i o se tagata e to'atasi"**.

Ua lagona le toa o le loto o Kitiona ona ua ia mautinoa, o le ā 'au fa'atasi o ia ma le Atua. Ua malosi foi lona mafaufau auā o le ā fesoasoani le Atua i le fa'ataunu'uina o le taua. Na faia e Kitiona le taulaga e fa'afetai ai i le Atua, ona o lona filifilia o lona fa'atauva'a e fai ma ana mea faigaluega.

O le tala lenā tamaiti; o se a'oa'oga lelei mo tatou, o tatou uma e filifilia e le Atua e fai ma toa i le talalelei, i totonu o tatou aiga, nu'u ma le Eklesia. Po o le a lava lou ituaiga tagata, mativa pe mauoa, malosi pe vaivai, e filifilia lava e le Atua i tatou e fai ma toa, e faasaoina ai o tatou aiga ma matua ma o tatou nuu ma le atunuu.

Uiga o Upu:

- i) tapeneto - o se laau e tupu tele, e aoga e fai ai laupapa (oak tree)
- ii) Ofira - o le igoa o le fanua o Ioasa le tamā o Kitiona
- iii) Apieserū - o tagata e tupuga mai ia Manase atalii o Iosefa.
- iv) Topito - aupito, pitoisili, faapitoa (Faataitaiga: e i ai aiga matitiva, ae aupitosili ai lava lo'u aiga)

GALUEGA FAATINO: Ta'alogia o le Mate Mai

1. Mate mai po o ai le toa lea na fasia Koliata i le ma'a-tā?
Tali: O Tavita.
2. Mate mai po'o ai le toa o Filisitia?
Tali: O Koliata.
3. O ai le igoa o le toa lea sa tatou talanoa ai i le taeao lenei?
Tali: O Kitiona.
4. O ai le toa o le Tala Lelei i nu'u 'ese?
Tali: O Paulo.
5. O ai le toa na fa'aolaina le lalolagi?
Tali: O Iesu.

Fautuaga: *E mautinoa e lē mafai ona maua e tamaiti tali o le mate, ae fautuaina lau Susuga ia fa'aleo e oe le amataga o le igoa o le toa, ae mate fa'auma ane e le fanau, e faigofie ai mo*

latou. Manatua e tele foi isi toa, afai e te manatua, aua le taofia pe afai o fiafia le fanau e fia iloa.

PESE: HE'S ABLE, HE'S ABLE

He's able, he's able
I know He's able
I know my Lord is able to carry us through (repeat)
He heals the broken-hearted
And set the captives free
He makes the lame to walk again
And the blind man to see! OH YES!

Na te mafaia, Na te mafaia
Ua ou iloa o ia e mafaia
Ua ou iloa e mafaia e le Alii ona fesoasoani mai
Na te fusia e loto-momomo
Pagota na te fa'asa'oloto
O pipili ua toe fa'a-savavaliina
Ma tauaso ua va'ai ma pupula. OH YES!

A'OA'OGA:

1. E filifilia e le Atua lo tatou fa'atauvā'a e fai ma toa e fa'ataunu'u lona finagalo.
 2. Ia avea i tatou ma toa o le Tala Lelei e tala'i atu le lelei o le Atua ma lona alofa i tagata.
 3. Ia toa e fai mea lelei, ae lē o mea leaga.
-

ASO SA: 12 NOVEMA 2023

MATAUPU: FA'AAOGĀ LELEI LE AVANOA UA MAUA

SINI: Ia malamalama le vasega, i le tāua o le avanoa ua maua e mafuta ai ma Iesu.

TUSI FAITAU: Luka 10: 38 – 42

FESOASOANI MO FAIAOGA:

E seāseā ona maua e se tagata se avanoa e mafuta ai ma Iesu, a'o i ai o Ia i lana galuega i le lalolagi. O i tatou uma lava tamaiti i lenei vaitau, e leai lava ma se isi na faafesaga'i ma Iesu, ia pe na mafuta faafesaga'i ma talatalanoa ma Iesu i totonu o lona potu, po o lona aiga foi ma le latou nuu. E lē pei la o le tatou tala i lenei Aso Sa, na mafuta ai Iesu ma tama'itai e igoa ia Maria ma lona uso o Maretā. O le tasi aso, na afe ane ai Iesu e fai sina mapu ma malolo i le fale o Maria ma Maretā i le nuu o Petania. Ua avea le afe ane o Iesu i le aiga o nei tama'itai, ma ala na manatu ai Maretā, e tatau ona saunia se meaai lelei, latou te aai ai ma Iesu, a o le'i toe alu e fa'aauau lana galuega. Sa silafia lelei e Iesu le pisi tele o Maretā i le tapenaina o le fale ma sauniuni mea uma, a ua avea ma ala ua lē maua ai se avanoa latou te talatalanoa ai ma faalogo i a'oa'oga a le Alii o Iesu. Peita'i o Maria, ua nofo lelei i tafatafa o aao o Iesu, ma faalogologo i ana fetalaiga ma a'oa'oga. Ua fa'aaoga lelei e Maria le avanoa ua maua e lo laua aiga ia Iesu, se'i faalogologo ai i upu tāua ma aogā a Iesu, e manuia ai ma ta'ita'iina ai le ola o aso uma. E pei o loo manatu Maria, o le avanoa o Iesu ua maua e lo laua aiga ma lona uso o Maretā, o se avanoa e lē maua e tagata uma. Peita'i, o le mea ua faia e Maria, na tupu ai le lē fiafia o Maretā, ona ua manatu ai Maretā, ua lē fesoasoani lona uso o Maria ia te ia, ae ua na ona nofonofo lava i tafatafa o Iesu.

O le tigā tele o Maretā, ma ua lē lava lona onosai, na ia fai atu ai iā Iesu, ina ia fai ane iā Maria, e alu ane sei fesoasoani atu iā te ia. Peitai, ua tali atu i ai Iesu, ua popole ma pupū lona loto i mea e tele, ae ua filifili e Maria le mea lelei ma le tāua, o le fia faalogologo lea i upu lelei ma a'oa'oga tāua tau i le malo o le Atua. E lē leaga le galuega ua faia e Maretā, auā se meaai ma tapenaga uma e talimālō ai faapei ona faia e le tele o tinā ma

tama'itai. Peita'i o le finagalo o le Alii o Iesu, ina ia fa'aaoga lelei le avanoa ua maua, e faasoa ai i mea aogā ma faamanuiaga e saunoa i ai Iesu. E peiseaī ua fetalai atu Iesu iā Maretā, ia faamuamua mea e tatau ona faamuamua.

Tamaiti, ua a'oa'o mai Iesu iā i tatou e pei ona ia faia iā Maretā, e lē aogā le faatāua ma faamuamua isi mea o le olaga nei, ae tatau pea ona faamuamua le Atua i mea uma e manuia ai le olaga.

Uiga o Upu:

i) fatuaiga - tagata e atia'e le aiga, auauna.

GALUEGA FAATINO: PEPA FAATUMU

Faatumu mai le pepa o faamatalaga o:

Iesu
Maria
Maretā

IGOA	NOFOAGA	MEA NA FAI	SA'O/SESĒ
Iesu	Fale o Maria ma Maretā	A'oa'o atu ma fia talanoa i mea lelei	Sa'o
Maria			
Maretā			

PESE: Seek ye first the kingdom of God

Seek ye first the kingdom of God
And His righteousness
And all these things
Shall be added unto you
A-le-lu Aleluia,

Saili muamua le malo o le Atua
Ma lona amiontonu
Ona faaopoopoina lea ia te oe
O mea uma Aleluia

A'OA'OGA:

1. Ia i ai se taimi o Iesu i lou olaga.
 2. Aua le maumau lou taimi i mea lē aogā.
 3. Faamuamua lou ola mo le Alii.
-

ASO SA: **19 NOVEMA 2023**

MATAUPU: **IA MANATUA LE FEAGAIGA**

SINI: Ia malamalama le vasega i le tāua o le ola i totonu o le feagaiga ma le Atua.

TUSI FAITAU: Teuteronomie 5:1 - 6

FESOASOANI MO FAIAOGA:

O le nuu o Isaraelu sa osi feagaiga ma le Atua i le amataga. O le tuutuuga o lea feagaiga, o le a avea ai Isaraelu ma nuu o le Atua, ae avea le Atua ma Atua o Isaraelu. O mea uma lava e mananao ai le nuu, e tatau lava ona fesili i le Atua, ma e faia lava e le Atua. E faapena foi i mea e finagalo i ai le Atua i tagata o le nuu, e tatau lava ona faalogo ma usita'i tagata uma.

O le mea ua tupu, ua amata ona lē tausi feagaiga le nuu o Isaraelu, e pei ona tau faailoa atu. Ua tele foi le lē usita'i ma le lē faalogo o tagata o le nuu, i faatonuga ma poloa'iga a le Atua. Ma o le mafuaaga tonu lea o le toe valaau o Mose i tagata o le nuu. Ina ia faalologo i tulafono ma faamasinoga a le Atua e manuia ai.

O tulafono e tatau ona a'oa'o i ai ma faatino loa. E lē o nisi tagata po o se isi augatupulaga latou te usita'ia tulafono ua tuuina mai. O le tausia la o tulafono ma le faamamaluina o tulafono mai le Atua e tagata o le nuu, o le manatuaina lava lea o le feagaiga na osia. O le faailoga foi lea o le tausi feagaiga e tagata o le nuu ma lo latou Atua.

Tamaiti, ua uma ona osi feagaiga i tatou ma le Atua. O le feagaiga lava na osia i le va o Isaraelu ma le Atua i le mauga o Horepa, o lo o fa'aauauina lava se ia oo mai i o tatou taimi. O lona uiga, e taua tele lo tatou saga faatauaina, tausi, ma ia tausolomua i tatou ona faamamaluina, e ala i le ola i tulafono a le Atua i aso uma.

GALUEGA FAATINO: **TAULOTO TULAFONO**

O lo o i ai lava nisi o fanau latou te lē o iloa tulafono e sefulu, na tuuina mai e le Atua i le amataga. E lelei ona tusi i se siata tulafono e tauloto faatasi ai le fanau. E manaia foi le tusi i se pepa e tofu ai le tagata ma lana pepa e a'oa'o ai tulafono e sefulu.

1. *Aua ne'i fai mo oe ni atua ese i ou luma.*
2. *Aua ete fai mo oe se tupua ua ta, po o se faatusa lava ose mea oi le lagi i luga, poo le fanua i lalo, po o i le sami o i lalo o le fanua.*
3. *Aua e te ta'u fua le suafa o le alii lou Atua.*
4. *Ia e manatua le aso sapati e te faapaiaina.*
5. *Ia e ava i lou tamā ma lou tinā, ina ia faalevaleva ai ou aso, i le nuu o le afoa'iina mai e le Alii lou Atua ia te oe.*
6. *Aua e te fasioti tagata.*
7. *Aua e te mulilua.*
8. *Aua e te gaoi.*
9. *Aua e te molimau pepelo i lē lua te tuaoi.*
10. *Aua e te mana'o fua i mea a lē lua te tuaoi.*

A'OA'OGA:

1. Ia usita'i i tulafono a le Atua.
2. Ia manatua le Atua na tatou osi feagaiga.

.....
ASO SA:

26 NOVEMA 2023

MATAUPU: **IA MULIMULI IA IESU**

SINI: Ia malamalama le vasega na valaauna tagata faifaiva e Iesu ina fai ma faifaiva i tagata.

TUSI FAITAU: Mareko 1:16-20

FESOASOANI MO FAIAOGA:

Ina ua uma ona papatisoina Iesu i le vai i Ioritana, ona amata ai lea ona fai o lana galuega tala'i. Ua ia a'oa'o atu i tagata e uiga i le malō o le Atua. O le galuega a Iesu e le'i faigofie, e tatau ona i ai nisi e fesoasoani iā te Ia. O le ala lea na ia manatu ai o le ā Ia tofia nisi e fai ma ona so'o e mulimuli atu iā te Ia i le galuega.

Ua savali ane Iesu e latalata i le vai o Kalilaia, ona iloa ai lea e Ia o Simona ma Aneterea lona uso, ua la lafo o la upega i le vai, ona o tama nei o tagata fagogota. Na fetalai i ai Iesu e tu'u o lā upega ma le faiva, ae mulimuli atu iā te Ia, ona lā mulimuli ai lea. **"Ina mulimuli mai ia iā te a'u, ou te fai ouluua ma faifaiva i tagata."** E le'i leva lava ona savavali atu Iesu ma Simona ma Aneterea, ae latou iloa foi Iakopo le atalii o Sepetaio, ma Ioane lona uso, o lo'o i luga o le va'a o lo o tau su'i masae o ō la upega. O tagata faifaiva foi i laua.

Ona fetalai atu ai lea o Iesu, e mulimuli atu iā te Ia, ona la tu'ua ai lea o lō la tamā, ae mulimuli atu iā Iesu. Ua tu'ua a latou fe'au masani i aiga, a ua latou mulimuli iā Iesu.

E lē faapea ua faalēaogaina a latou taleni ma agavaa sa masani ai i le ola o aso uma, faapei o le faifava. Peita'i ona o le mana'o o le Alii, ina ia fa'aaogaina e fai ma fesoasoani ia te Ia i le galuega. E

lē gata foi i lea, o le valaau atu o Iesu i nei auso ina ia mulimuli mai ia te Ia, e lē ona ua leaga o latou aiga, o nai o latou matua ma mea o loo nonofo ai. O le finagalo lava o le Alii o Iesu, i le galuega faa-fai-faiva, e saili ai ni tagata e loto atu ma latou talitonu i le Tala Lelei ia Iesu Keriso.

E valaau mai loa Iesu i se mea e mana'o ai mo i tatou tamaiti, tuu loa mea o lo o tatou nanau i ai ma mea o lo o tatou fiafia i ai, ae usita'i ma faatino loa. Faata'ita'iga, a valaau mai loa nai o tatou matua, o nai o tatou faifeau, o faiaoga mo tatou, tatou usita'i loa.

GALUEGA FA'ATINO: PASO

Saili mai upu nei i totonu o le paso:

Kalilaia, Simona, Aneterea, Sepetaio, Iakopo, Ioane, Iesu Keriso.

K	Y	U	R	S	S	R	S	V	C	X	T
G	A	N	E	T	E	R	E	A	B	W	K
D	H	L	W	F	P	Q	W	I	N	J	L
C	G	L	I	T	E	R	E	E	B	R	T
V	O	I	O	L	T	H	R	S	E	X	R
T	A	L	A	N	A	M	T	U	U	C	K
S	Q	R	N	L	I	I	A	K	O	P	O
I	W	E	E	K	O	L	A	E	I	A	L
M	B	T	A	E	A	P	P	R	P	S	E
O	N	Y	Q	D	U	E	W	I	L	D	A
N	M	I	Y	A	L	T	H	S	I	P	D
A	J	L	P	L	P	Q	G	O	F	M	O

PESE: Ua ou filifili e mulimuli ia Iesu

A'OA'OGA:

1. Fa'alogo ma usita'i i a'oa'oga a Iesu e manuia ai lo tatou lumana'i.
 2. Tatou mulimuli i a'oa'oga ma fa'ata'ita'iga na faia e Iesu, ae aua le mulimuli i ta'aiga sesē.
 3. Ia fai i tatou ma so'o e tala'i le tala lelei īā Iesu Keriso.
-

MANATU TAIALA O TESEMA: FANAU MAI LE TUPU O TUPU

O le vaitau lenei e taua o le Etiveni (Advent) o le toe afio mai o Iesu, po'o le taunu'u mai. E mafaufau loloto ai tagata i le alofa silisili o le Atua ma lona Afio mai i le lalolagi. Aemaise ai o lenei vaitau o le kerisimasi, o le vaitau o faiga meaalofa ma feofoofoa'iga. O le fanau mai o le Tupu o Tupu, o le meaalofa sili lea mo le lalolagi atoa tatou te faamanatuina pea i lea tausaga ma lea tausaga.

ASO SA: **3 TESEMA 2023**
(ASO SA O LE ETIVENI)

MATAUPU: **TATOU Ō I SIONA**

SINI: Ia malamalama le vasega, o Siona o le Afioaga o le Alii

TUSI FAITAU: Isaia 2: 1 – 4

FESOASOANI MO LE FAIAOGA:

E ta'u loa Siona e leai lava se tasi e mo'omo'o i le fia o'o i ai. Aisea? Auā fo'i e pei o le fa'atumutumuga lea o so o se Isaraelu lava. E foliga e fa'apena le ata o tau fa'amatala nei e Isaia e tusa o le fa'aaliga na ia va'aia, i le ola naunau o le fanau a le Atua e fia o'o i Siona. O se nofoaga sa fa'asi'usi'u mata i ai le ola

fa'atuatua o tagata Isaraelu e fia o'o i ai. O le a'ai fai mai e afio ai le Atua. O Siona o le mauga i le a'ai o Ierusalema, o lo o taua i le Feagaiga Tuai o le Mauga o Siona. Sa tu ai le olo o Sa Iepuse; ituaiga o Sa Kanana sa ulua'i nofoia le a'ai o Ierusalema a o le i faoa e le tupu o Tavita. Le mauga lea fa'apea na a'ea e Tavita ma fa'aigoa ai o le "A'ai o Tavita".

Ae tusa ai ma le molimau a Isaia, o Siona o le a'ai e afio ai le Atua Silisili ese, le tupu o le lagi ma le lalolagi. Siona le a'ai o lo o fa'amatalaina e Isaia o le (*temple city*), e afio mau ai le "Atua o Iakopo". E logologoa ma a'ave tala o lenei a'ai ona o le mauga o le Atua. E tu matilatila Siona mai luga o le mauga; e mamalu ma paia aua e Afio ai le Atua. O le Afio ai la o le Atua i Siona, o le fa'ailoga o le manuia o le nu'u, le mamalu ma le paia o le Atua ua paia atoa ai Siona. O le fa'ailoga o le malu puipuia o tagata mai le osofaia e le fili ma nu'u tuaoi.

O le ala lena o le fa'apea ane o nu'u uma, "O maia, tatou o a'e i le mauga o le Ali'i, o le fale o le Atua o Iakopo". O le fesili, aisea e o ai i Siona? O le nofoaga e Afio ai le Atua; e puna mai ai le manuia sili pe a fetalai mai le Atua i ana tulafono, ma a'oa'o mai i lana amiontonu ma lana fa'amasinoga tonu mo ona tagata. O le uiga foi lena o lenei Aso Sa ua taua o le Etiveni, o le taunu'u mai o le Alii Faaola

O lona uiga o le Mesia o lo o valoia e Isaia, o le Atua lava lea ua afio mai i le lalolagi ma mafuta ma le lalolagi. Tatou o i Siona o le nofoaga e puna mai ai le manuia, o le nofoaga o le Atua.

Uiga o Upu ma Fuaitau:

- | | | | |
|------|-----------------|---|--|
| i) | tumutumu | – | o lo'o faatusa i le pito i luga o le mauga |
| ii) | mauga o le Alii | – | nofoaga e afio ai le Alii |
| iii) | tu'i | – | fete'ena'iga |

iv) suotosina – o u'amea malolosi ma le ma'ama'ai e fa'aaogaina e faamalū ai le palapala.

GALUEGA FAATINO: Paso

Saili mai upu nei (Siona, Amota, Ierusalema, Suotosina, Polo, Iakopo, Vine, Mauga, Iuta, Tao, A'oa'i)

I	N	R	S	T	A	O
E	H	W	U	J	M	K
R	O	P	O	K	A	I
U	V	G	T	O	U	A
S	I	Y	O	A	G	O
A	N	A	S	N	A	A
L	E	T	I	O	T	O
E	N	U	N	I	U	L
M	P	I	A	S	I	O
A	A	T	O	M	A	P

PESE: Tatou o i Siona (fati: Hark the Herald Angel Sing by Boney M)

Omaia tatou o talitonu
Faailoa le fafia
Tatou fai pesega malie
Ia viia ai lona Suafa

Tali:
Tatou o i Siona
Matagofie foi Siona
Tatou o i Siona

O le aai o le Atua

A'OA'OGA:

1. Ia fifiai e alu i le Mauga o le Alii
 2. O Siona o le afioaga paia o le Atua
 3. Tatou tufi taufao i manuia ua sasa'a mai e le Atua
-

ASO SA: **10 TESEMA 2023**

MATAUPU: **O LE TUPU E TULIVAE UMA I AI LE LALOLAGI**

SINI: Ia malamalama le vasega, o Iesu Keriso le Tupu Silisili e ifo uma ai tupu uma lava

TUSI FAITAU: Mataio 2: 1 – 12

FESOASOANI MO LE FAIAOGA:

O lea ua mae'a ona feiloai Makoi ma Herota, ma ua faailoa i le tupu le auga o lo latou malaga mamao mai. Sei ifo i le pepe ua fanau mai, o le tupu o tagata Iutaia, ma sei momoli meaalofa, o faailoga o lona tulaga mamalu ma le taualoa. O Makoi o tagata popoto ia i le Sosaiete i ia ona po. E ia i latou le tomai e malamalama ai ma faauiga le natura o mea o le foafoaga. E talitonuina e tagata lo latou tomai, ma o le ala foi lea o le lē fesiliglia e Herota o lo latou faauigaina o le fetu, ae ua fia malamalama atili i le taimi na iloa ai le fetu.

E le i fa'aalia se to'atamai o Herota i le au-Makoi e tusa ma le feau ua latou momoli mai. Pau le mea ua mautinoa, ua fuā le loto o le tupu auā o lea o le a luitauina lana nofoaiga, ma e le fia

toilalo foi i se isi tupu. Lea ua fa'aauau le malaga a Makoi, sei ave le fa'aaloalo i le tupu o tupu e tulivae uma ai le lalolagi uma. O le taita'iina o Makoi e le fetu, o le faailoga lava lea o le auai o le Agaga o le Atua, i la latou faigamalaga, aemaise o la latou faaiuga e ui i se isi ala ae le o le manao o Herota.

Ua latou maua le tama-itiiti ma lona tinā, ua fa'apa'uū ma ifo ia te ia, ua talai foi a latou oloa ma latou avatu ia te ia. E tusa ai ma le molimau a Mataio, o le ata manino lea o le tulaga ese ma le mamalu o le tupu ua fanau mai, o le tupu e tulivae uma ai le lalolagi. E pei o lā le fai Salamo, e auauna ia te ia o nuu uma lava.

Manuia tele le Kerisimasi ma le Tausaga Fou

GALUEGA FAATINO:

Faatino le tala i Makoi e to'atolu ua latou ave meaalofa ma ifo atu ia Iesu.

PESE: E toatolu tupu na o

A'OA'OGA:

1. O Iesu le Tupu e ifo uma ai tupu o le lalolagi
2. Talia le afio mai o le Tupu o Tupu
3. Avea Iesu e fai ma ta'ita'itama i lou ola

Ia manuia le Kerisimasi ma le Tausaga Fou

.....